

Kareta PaarꞰ Nennoko'pꞰ Ron Pon Kon Ena' Ekamanin

Kareta PaarꞰ Nennoko'pꞰ Ron Pon Kon Ena' e'menuka'pꞰ, tꞰuti e'ma ta' to' ekonekato' pe iye'kuu'pꞰ rꞰ'pꞰ tꞰutito' pe so'si Ron po na'ne' pona. Iyekonekato' esi'pꞰ te'tarawasomato' pe KꞰri'san amꞰ' koro'tau miri yau aka'ne' pe ri, miri awonsi'ki to' uya tꞰpika'tii' tꞰutito' pe SꞰ'pen pona. Imenuka'pꞰ iya KꞰri'san amꞰ' uya apurito' to'ka'nꞰkꞰ tꞰuya ekamanin pe miri awonsi'ki KꞰri'san amꞰ' uko'manto' tenpoikai' inku'pai te'to' ri. Kareta yau iyenuka'sa' pe inekamanꞰ itekareei esi.

Miyari ta tꞰpo ka'pon amꞰ' so'si tawon kon Ron pon kon pi' miri awonsi'ki to' pana'ti tꞰpo to' pona tꞰwipꞰremato' pi', PaarꞰ uya ekama tꞰkaretaai yau tꞰusauro'to' ipi': “Itekare uya enpoika Papa uya ka'pon amꞰ' konekato' tꞰpokon pe: Apurito' poro iyepiya'ti'pꞰ si'kiri iu'matꞰ pꞰ'kꞰ pona” (1:17).

PaarꞰ uya nin si seri tꞰusauro'to' ipi' emo'ka. Tanporo ka'pon amꞰ', asa'ri ri EsuwerꞰ amꞰ' miri awonsi'ki EsuwerꞰ amꞰ' pen, ekonekato' pe iyesi Papa pokon pe, apꞰne pꞰra tanporo ri isi'kaisari ri mako'i meruntirꞰ o'no to' esi pi'. Ka'pon amꞰ' ekoneka Papa pokon pe Sises KꞰrai apurito' to' uya poro. TꞰron ni, PaarꞰ uya ekama emenna' pe uko'man nito' KꞰrai ya' tꞰwenai' ipokon pe e'nito' seri si emenna' pe Papa pokon pe e'nito' moron

nu'pu pe. Papa pokon pe apurinin e'to' esi ewankamanin puṛa miripan emo'ka Papa Akwaru wini makoi miri awonsi'ki uma'tan nito' meruntiru apai. Isa'ta 5—8 yau Paarṛ ri mari uya ekama usauroku Papa iwano' main e'to' mirito' tukai', miri awonsi'ki Papa Akwaru meruntiru pi' apurinin pe te'sen uko'manto' yau. Miri awonsi'ki itekare ekamai' enno'sa' e'kaai'ma a'toman nito' pokon pe miri kasa Esuweru amṛ miri awonsi'ki Esuweru amṛ pen epata'ti ka'pon amṛ iwano' pe Papa nukonekanu ya' tawon pokon pe. Iye'nonka Sises ewaruma'tito' Esuweru amṛ uya esi, Papa ekonekasa' pe ri tanporo ka'pon amṛ ne'nin pe Papa uya waku nonkato' Sises Kurai yau eporo to' uya poken, miri awonsi'ki apuri iya tiwiri ri Esuweru amṛ uya Sises ewaruma'ti pen tukai'.

Iu'matu pe Paarṛ uya imenuka se kasa Kuri'san pe e'ni uko'manto' esi tukai', tṛusi'nṛnkai' tṛon kon pokon pe e'nito' pi'. Anṛnpitu iya tṛsauro'to' ipi' ton pe Papa apiyo' pe e'nito' pi', pata esanon pi' tṛtṛrawasooi kon ku'to' Kuri'san amṛ uya pi', miri awonsi'ki isitonpa pe te'to' ku'to' pi', miri awonsi'ki ewan wanni uya i'tun nito' pi' uta'toman nito'. Tukaretaa i'ma'ka iya tekareei ton ke ri miri awonsi'ki Papa apuripi'to' main ke.

Iyawon Ekamanin

Ekamanin miri awonsi'ki isauro'to' ipi' (1:1-17)
 Epika'tin nito' i'se kuru e'nito' (1:18—3:20)
 Papa eseru epika'tin nito' pi' (3:21—4:25)
 Emenna' pe uko'man nito' Kurai yau (5:1—8:39)
 Esuweru Papa ekonekato' yau (9:1—11:36)
 Kuri'san pe e'ni e'to' (12:1—15:13)

Iye'nonkato' miri awonsi'ki tumiri pe miyari
tato' iya (15:14–16:27)

¹ Paar_u, Sises Kurai poitor_u, esa'sa' itekare ekamai' enno'sa' pe, imo'kasa' wak_u Papa ekareei iwano' pe, winipaino. ² Seri itekare ikup_u uya tukai' isaurok_u'p_u ru'p_u pena pu'kena' am_u' imaimu pe t_usauro'san poro Wak_u iye'menukasa' itekare yau ³ tumu pi', ka'pon pe te'to' yau Tepi' pa ru'p_u pe na'ne'. ⁴ Wak_u pe te'sen Iya'kwar_u poro ekamasa' ru'p_u merunti ke Papa Mu pe* iye'm_u'sa'ka wini iyeriku'p_u apai: Sises Kurai si uyepuru kon. ⁵ Iporo miri awonsi'ki itese' iwano' pe wak_u nonkasa' eposa' man innennoko'san pe e'nito' pe, ka'pon am_u' ne'nin pe e'nito' pe Esuwer_u am_u' pen koro'tapai imaimu awiron pe to' e'to' pe apurito' to' uya wini. ⁶ Miri awonsi'ki imiri'nokon ni niri si esi kamoro Sises Kurai iwano' pe iki'masa' kon koro'tau.

⁷ Tanporon kon Ron pon kon enakan Papa ni'n_ukan_u ton miri awonsi'ki iki'masa' kon wak_u ton pe to' e'to' pe:

Wak_u nonkasa' miri awonsi'ki t_usewankamai' p_ura iwe'to' kon Papa, uk_uip_un_u kon miri awonsi'ki Itepuru Sises Kurai winon nesii iyenakan kon pe.

Paar_u E'to' Ron Pona Itipai

⁸ Wapiya, Papa pi' tenki ta uya Sises Kurai poro tanporo imiri'nokon pi', ap_une p_ura apurito' auya'nokon usekare'tisa' tanporo non em_u' kaisa ri. ⁹ Papa, iyapiyo' pe e'to' tanporo uyewan a'kiri

* **1:4** ekamasa' ru'p_u merunti ke Papa Mu pe; miri pe p_ura, ekamasa' ru'p_u t_umeruntir_u ke Papa Mu pe

Imu ekareei wakꞫ ekama uya yau, esi uyekamanin pe inke ri uyenu yau ikupꞫ uya 'nokon¹⁰ ipurema yau tiwiri ri; miri awonsi'ki ipurema si seri pe ri Papa eseru awiri ite'ma uta'kokasa' e'to' pe ipiya'nokon utito' pe.

¹¹ Iyenpai'nokon esi ipika'tito' kon pe uya iya'kwarꞫ nutarꞫ eponin pe, pana' pe iku'nin kon pe— ¹² miri si, imiri'nokon miri awonsi'ki uri uya apurito' wini epori'mapi'nito' pe asa' ipi'.¹³ I'tunin nan pe pura iwesi kon i'se pura esi, utonpa ton, ekonepitꞫꞫ inke ri ipiya'nokon utito' pe (e'tane miri namai' uwa'ka'pi'sa' seri pona ri nin si) i'koro'tau'nokon iyaku'pꞫsa' ananto' pe uya, tꞫron kon Papa pꞫnon kon koro'tau eporo'pꞫ uya kasa.

¹⁴ E'nonkasa' pe ri esi asa'ron kon ena' Kiri' amꞫ miri awonsi'ki Kiri' amꞫ pen ni ena', asa'ri ri emepoke' ton miri awonsi'ki emepo pꞫnon kon ena'.¹⁵ Miri pe iyese pi', wakꞫ itekare inekamapai kuru esi seri imiri'nokon Ron pon kon pi' ri mari.

¹⁶ WakꞫ itekare pi' ipiyitꞫ pen ni, apꞫne pura Papa meruntirꞫ pe iyese tanporon kon apurinin nan epika'tito' ike pe; wapiya EsuwerꞫ iwano' pe, miri awonsi'ki EsuwerꞫ pen iwano' pe. ¹⁷ ApꞫne pura wakꞫ itekare yau Papa uya anꞫn ni ipokena' ri tukai' apurito' wini iyepiya'ti si'kiri iu'matꞫ pona,† iye'menukasa' na'ne' kasa: “Ipokena' awiri te'sen uko'mamꞫ apurito' wini,”‡ tawon.

Ka'pon Kota'mato' Papa Uya

1:13 InkupꞫꞫ 19:21 **1:16** Ma' 8:38 † **1:17** iyepiya'ti si'kiri iu'matꞫ pona; miri pe pura, apurito' apai apurito' pona ‡ **1:17** Apa'ka' 2:4

¹⁸ Papa uya kota'man nito' usenpoikasa' Epun poi Papa para e'nito' miri awonsi'ki iri ka'pon amu' eseru pi' waku i'tuto' pe para iku'nin nan iri teseru kon wini, ¹⁹ Papa i'tuto' ipi' esi to' pona tense ri, apune para tense ri Papa uya iku'sa' to' pona. ²⁰ Apune para non e'kaa'pu si'kiri Papa ewakiri tatusensen pen—siyaro' ri imeruntiru miri awonsi'ki Papa pe iye'to' i'naino ri—usensa' waku pe ri, tuto'ka'nu'se iyekonekasa' ru'pu wini, ka'pon amu' e'to' pe iye'wapu'tito' ipona para.

²¹ Apune para Papa i'tu tane to' uya, Papa pe to' uya apuripitu para iyesi, to' uya tenki ta para ri iyesi ipi', e'tane to' usenuminkato' esi iwotoripi para ri miri awonsi'ki emepo pun to' ewan ewarumamu'pu. ²² Emepoke' pe to' e'ku'tane, epe' ri to' ena'pu, ²³ miripan kon uya Papa teri'sen pen ku'to' eke pe entakanoma'pu to' uya ipe iye'to' pe ika'sa' ke ka'pon teri'sen pe ri nin miri awonsi'ki toron amu' pe miri awonsi'ki o' amu' pe miri awonsi'ki ene amu' ri.

²⁴ Miri pe iyesi pi', Papa uya to' nonkasa' iri to' ewan e'to' i'se yau iri pe tekumato' kon yau tatonpa kon pokon pe tapun kon eno'mato' to' uya ya'. ²⁵ I'nairon pe Papa e'to' entakanoma to' uya kasi pe e'nito' ke, miri awonsi'ki ika'sa' ton ni apuripitu to' uya miri awonsi'ki iyapiyo' pe ri to' esi ika'nin nu'pu ta pe para ri—tiwiri ri tapuripi'sen. Amen.

²⁶ Miri pe iyesi pi', Papa uya to' nonkasa' piyi'nu'nin ni niki eseru ya'. To' uri'samo ton ni uya i'naino pe ri e'nito' entakanoma i'naino pen

ni ke. ²⁷ Miri kasa ri mari, warawoti'si amu' uya i'naino uri'san pokon pe e'nito' nonkasa', miripan kon a'mintasa' tunikiru kon yau tatonpa kon pi'. Warawoti'si amu' uya iri ri kuu'pu warawoti'si amu' pokon pe, miripan kon uya tekota'mato' kon eposa' tupun kon yau iye'to' awiri para te'sa' kon wenai.

²⁸ Miyari ri, to' usenuminka kasa para ri Papa i'tunin pe e'nito' enkurunpanin pe, to' nonkasa' iya iye'to' awiri para to' usenuminkato' ya', taku'sen pen ni ku'to' pe to' uya. ²⁹ To' ri si epe'tisa' tanporon ni iri eseru ke, iri ke, mentai e'nito' ke miri awonsi'ki iteseru pe te'sen awiri para e'nito' ike ke. Iri pe taron kon pi' te'ku'san pe to' esi, te'wisan pe, isipi' te'san pe, enku'tinin nan pe miri awonsi'ki iri inku'pai te'san pe. Ka'pon eseru pi' tusauro'san pe, ³⁰ iri pe ka'pon pi' tusauro'san pe, Papa ewaruma'tinin nan pe, sapemanin nan pe, i'tunin pe te'ku'san pe, miri awonsi'ki tautapurisan pe; iri kupu eseru sara'tinin nan pe; tasan kon maimu awiron kon pen pe; ³¹ iya'kwaru panon kon pe, apuri pokena' ton pen pe, tuisi'nankasan pen pe, isentu'manon kon pe, aiko tawon nan pen pe. ³² I'tui'ma ri Papa usauro'sa' esi ipoken kamoro seri rupi ku'nin nan esi uma'tan nito' eponin nan pe tawon, seri ton kuru kupu to' uya, miri awonsi'ki kamoro seri ku'nin nan pi' ri niri waku pe man ta to' uya.

2

Papa Uya Ipoken Eseru Aimenkato'

¹ Miri pe iyesi pi', imiri, ka'pon, inu' ri eseru aimenkanin, iye'wapu'tito' ipona para iyesi, i'ri

poiri ri taron ni eseru aimenka auya, iiwano' pe ri nin iuseno'ma miri, apune para imiri eseru aimenkanin uya miri ton ni kupu. ² Seri si i'tu'nokon Papa uya eseru aimenkato' esi kamoro seri rupi ku'nin nan pi' esi i'nairon po. ³ Miri kasa si imiri, ka'pon ni nin, uya eseru aimenkato' kupu a'tai to' pi' miri ri kupu'i'ma, Papa uya eseru aimenkato' piyapai ayainumu tukai' pe' iye'kupu? ⁴ Miri pe para kati, eke pe ri isi'nanke' pe iye'to' iku'tane auya, iyenpi'to' iya, miri awonsi'ki tausea'takai' para iye'to' nurunpa auya, i'tui'ma para Papa e'to' isi'nanke' pe uya ayato' esi iyera'tito' ya?

⁵ E'tane apune para sa'man pe ri tera'tisen pe para ri iyewan esi pi', kota'man nito' amuranuku auya iiwano' pe ri Papa uya kota'man nito' weyu a'taino pe, ipokena' eseru aimenkato' iya usenpoika a'tai. ⁶ Papa uya, "ituru ka'pon kaisa ri inkupu'pu pi' tense,"* tasa' iya. ⁷ Kamoro ka'pon amu' sa'man annawiri waku kupu pi' te'san uya eke pe tuku'to' kon, tnamato' kon miri awonsi'ki eri'nito' pen warinpa ena' inke ri uko'man nito' turu iya. ⁸ E'tane kamoro tiwano' kon pe ri te'san miri awonsi'ki i'nairon ana'sipai para te'san miri awonsi'ki iri pikiri te'san pi', moro isakorotasa' pi' ekota'man nito' esi miri. ⁹ Moro ewankamanin miri awonsi'ki a'kwaru ainanpanin e'to' oton tanporon kon iri ku'nin nan ka'pon amu' pi': wapiya Esuweru amu' pi', miri tupo Esuweru amu' pen; ¹⁰ e'tane eke pe iku'to', inamato' miri awonsi'ki tausewankamai' para e'nito' esi tanporo waku

2:1 Ma'siu 7:1; Uru' 6:37 * **2:6** Eren 62:12; Ipu'ketu 24:12

ku'nin nan iwano' pe: wapiya Esuwer_u am_u' pi', miri t_upo Esuwer_u am_u' pen pi', ¹¹ ap_une p_ura Papa esi pi' tenu yawon kenan pe p_ura ri.

¹² Tanporon kon, main, Mosi' winon piyapai imakoitasa' kon uma'tato' oton miri main piyapai ri mari, miri awonsi'ki tanporon kon imakoitasa' kon main o'noro eseru utaimenkato' oton main ke. ¹³ Ap_une p_ura kamoro miri main etanin nan esi pen ipokena' pe Papa enu yau, e'tane kamoro main awiron kon an_um_u Papa uya ipokena' ton tukai'. ¹⁴ (Kasi pe p_ura, Esuwer_u am_u' pen, main, Mosi' winon esanon pen, uya ikup_u ti'naino kon ni main e'to' i'se, main pe ri tiwano' kon pe to' esi, main esanon pe p_ura ri esii'ma, ¹⁵ to' uya enpoika si'kiri miri main e'to' i'se e'menukasa' to' ewan pi', to' ewan uya ri niri ekama to' pi', miri awonsi'ki to' usenuminkato' uya ri ipoken p_ura to' e'sa' ekama, miri awonsi'ki t_uron ni a'tai ipoken to' e'sa' ta iya ri.) ¹⁶ Seri e'ku'to' oton Papa uya ama'aino eseru aimenka weyu a'tai Sises K_urai poro, wak_u uyekareei nekamayai'ne' kasa.

Esuwer_u Am_u' Miri Awonsi'ki Main, Mosi' Winon

¹⁷ Imiri nin si, Esuwer_u pe te'sesa'sen; main, Mosi' winon enupikiri te'sen miri awonsi'ki Papa pokon pe iwe'to' pi' t_uutapurisen. ¹⁸ I'se iye'to' i'tunin pe iwesi yau, miri awonsi'ki ewai' tawon pe te'sen epoi te'sen pi' ap_une p_ura main nenupa'p_u pe iwesi pi'. ¹⁹ Pori' pe iwesi yau tenku'na' nan anin pe iwesi pi', ewarupi yau te'san weyu pe iwesi pi', ²⁰ iya'kwar_u p_unon enupanin pe iwesi kon pi',

aiko ton nu'kwɪ mure amɔ' ti'saai pe iwesi pi', apune pɔra main esi waku pe i'tuto' miri awonsi'ki i'nairon yen pe— ²¹ Imiri si, tɔron kon enupanin, iiwano' pe pe' iusenupa pen ni? Imiri ama' pe e'ni namai' itekare ekamanin, ama'manin pe' imiri? ²² Imiri iyemari'masa' kon ka'pon amɔ' kusekumanin tawon, tekumasen pe' imiri? Imiri papa tato' ipi' pe ika'sa' itewaruma, ipareman nito', use'man nito' iwɔ' ton pe' rapumanin imiri? ²³ Imiri main pi' tɔutapurisen, main pe' ti'kwɪ'se Papa namanin pe pɔra te'sen imiri? ²⁴ Iye'menukasa' na'ne' kasa: “Papa ese' e'sapema Esuwerɔ amɔ' pen koro'tau imiri'nokon uriya,”† tawon.

²⁵ Itepe' e' pe un pi'pi puturɔkato' esi main awiri iwesi yau, e'tane main i'kwɪtɔ auya yau, itun pi'pi puturɔkasa' pen pe ri iyena. ²⁶ Kamoro itun pi'pi iputurɔkasa' kon pen e'sa' main e'to' i'se awiri, itun pi'pi iputurɔkasa' kon pe pe' to' kupɔ pen? ²⁷ Kɔri ipun pe itun pi'pi iputurɔkasa' pen, miripan e'tane main awiron, uya iyeno'ma miri, imiri iye'menukasa' main tensen pe esa'‡ miri awonsi'ki un pi'pi puturɔkato' esa', esi main i'kwɪ'nin pe.

²⁸ Ka'pon esi pen miri Esuwerɔ pe kuru kipo'po ri kɔri ri pe iyesi yau, miri awonsi'ki kipo'po ri, ipun pe ri un pi'pi puturɔkato' esi niri pen ni. ²⁹ Kane, ka'pon esi miri Esuwerɔ pe kuru tɔyau kɔri ri pe tesi yau; miri awonsi'ki un pi'pi puturɔka esi tepe' ke ri ewan wannɪ ma'kɔɔ'ti

† **2:24** Aisaya 52:5; Isi'kiyerɔ 36:22 ‡ **2:27** iye'menukasa' main tensen pe esa'; miri pe pɔra, iye'menukasa' tensen pe main wini

kasa, iya'kwaru wini, iye'menukasa' main na'ne' awiron pen ni. Puse ri waraino ka'pon apuripi'to' esi miri ka'pon winipaino pen, e'tane Papa winipaino pe.

3

Papa Tausauroka'pu Awiron

¹ I'ri eponin pe ken si e'ni Esuweru pe e'ni yau, miri pe para i'ri epe' pe yun wannu pi'pi puturaka?

² Eke pe ri tanporon yau ri! Tanporon wapiya, Papa maimu kuru ri e'nonka'pu miri to' ena'.

³ I'ri pe ken iyesi to' tonpa ton uya apurito' para iyesi yau? To' uya apurito' para iyesi uya Papa e'to' tausauro'sa' awiri para kupu? ⁴ Pen kuru ri! Tiwi Papa nesii i'nai ri, miri awonsi'ki tanporon kon e'tane kasi ye' pe. Iye'menukasa' na'ne':

“Ipokena' pe iusi'tu pa amaimu yau

iyeseru aimenkato' yau itentai iyena pa,”*
tawon.

⁵ E'tane ipoken para e'nito' uya Papa e'to' ipoken enpoika waku pe kuru, i'ri ken si ta? Papa esi waku pe para ri uya kota'man nito' nepu upona'nokon ta? (Ka'pon e'sei'pi'to' e' pe ri nin si e'kapu.)

⁶ Miri kasa iyesi pen! Miri kasa iyesi yau, nai kasa Papa non eseru aimenkai'no? ⁷ Ka'pon ni entarumu, “Kasi ye' pe esi uya Papa e'to' i'nairon pe koneka yau eke pe iku'to' temo'kai', i'rito' pe ken si tumakooikenan pe uyeno'ma?” ⁸ Tapai para pe' nai—kasi ye' pe ri ina pi' usauro'nisa' na'ne'

kasa miri awonsi'ki taron kon uya ikupu, ina uya—
 “Iri ku'pai'nokon waku pe itepe'pu e'to' pe,” ta, ta
 pura? To' eno'mato' esi miri i'se to' e'to' pe ri.

Inu' Ipoken Te'sen Pun Ni

⁹ I'ri ken si? Ina ken pe' si Esuweru amu' esi
 waku† ton pe? Pari pen ni! Ekamaka'sa'nokon
 ni miri, Esuweru amu' miri awonsi'ki Esuweru
 amu' pen esi miri isi'kaisa ri makoi o'no.

¹⁰ Iye'menukasa' na'ne' kasa:

“Inu' ri pura iyesi ipokena' pe te'sen, tikin nan pura
 ri;

¹¹ inu' ri pura iyesi ito'ka'nu'nin,
 inu' ri Papa warinpanin.

¹² Tanporon kon ni era'tisa' isi'kaisa ri siya
 tanporo ri to' enasa' se pe ri;

inu' ri pura iyesi waku ku'nin,
 tikin nan pura ri.”‡

¹³ “To' esen ton esi emenna' ton akasa' uruwai' ton
 pe;

to' ani ton esi enku'tin nito' ku'nin pe.”§

“Iku'i urarii ri esi to' e'pi pi'.”*

¹⁴ “To' muta ton epe'tipi'sa' e'pa'nu'nito' miri
 awonsi'ki isipi' e'nito' ke.”†

¹⁵ “Aitune' pe ri to' puta ton esi mun ennoko pi';

¹⁶ to' uti'pu e'ma'pu tau uma'tan nisa' miri
 awonsi'ki usewankaman nito' e'nimi,

¹⁷ miri awonsi'ki tuusewankamai' pura ka'pon
 uko'manto' ku'to' to' ni'tunu pen.”‡

† **3:9** waku, miri pe pura iri ‡ **3:12** Eren 14:1-3; Eren 53:1-3;
 E'kirisiyastes 7:20 § **3:13** Eren 5:9 * **3:13** Eren 140:3 † **3:14**
 Eren 10:7 ‡ **3:17** Aisaya 59:8

18 “Papa pi' to' enari'nanto' p̄ra ri iyese to' enu yau,” §
tawon.

19 Serì si i'tu'nokon, tanporo main uya tasa' na'ne', ta iya kamoro main o'no na'ne' nan pi', tanporo m̄ta e'tutakato' pe miri awonsi'ki tanporo non pon kon e'to' pe Papa pi' ekamanin pe.

20 Miri pe iyese pi', inu' ri anumu Papa uya p̄ra iyese ipokena' tukai' main kupu iya pi'; e'tane ru'ku, main poro makoi i'tunin pe enan.

Ipoken E'ni Apurito' Poro

21 E'tane nin si serì Papa uya ka'pon amu' ananto' ipokenan pe usi'tusa', main piyapai, main, Mosi' winon miri awonsi'ki Pu'kena' amu' nekamayi'ne'. 22 Serì ipoken e'nito' usi'tusa' uyepu Sises K̄rai apurito' poro tanporon kon apurinin nan piya'. T̄ponaron p̄ra ri iyese, 23 ap̄ne p̄ra tanporon kon ni umakoitasa' miri awonsi'ki to' u'ma'sa' mi airi ri eke pe Papa ku'to' tepose p̄ra, 24 miripan kon ekonekasa' t̄use'mai' p̄ra waku nonkasa' iya wini e'man nito' poro iye'sa' K̄rai Sises wini. 25 Papa uya it̄sa' use'man nito' ike pe upi'nokon t̄usentu'mato' pe* im̄nu apurito' poro. Serì ku'sa' iya ipokena' pe tesi ekamanin pe, ap̄ne p̄ra a'k̄are'tinin pe tesi ke makoi ton pena iye'ku'sa' ru'san nonka'p̄a iya t̄poni'simai' p̄ra— 26 ikuu'p̄a iya ipoken tesi serì a'tai tukai' enpoikanin pe, ipoken teseru esi enpoikanin pe

§ 3:18 Eren 36:1 3:20 Eren 143:2; Kare'siya 2:16 3:22
Kare'siya 2:16 * 3:25 use'man nito' ike pe upi'nokon
t̄usentu'mato' pe; miri pe p̄ra, k̄ri tukota'man nito' i'ni'panu'nin,
makoi mo'kai'ma

miri awonsi'ki ka'pon amu' anunnin pe ipokena' pikiron kon pe Sises apurito' wini.

27 Nai ken si utapurin nito'? Miri para ri iyese. I'ri iteseru pe? Main pe' awiri e'ni pi'? Kane, e'tane apurito' pi'. 28 Apune para ka'pon anamu Papa uya ipokena' pe ta'nokon apurito' wini main awiri e'ni wini para. 29 Papa pe' esi Esuweru amu' riken e'to' itese' pi' pe? Esuweru amu' pen e'to' itese' pi' ri niri pen pe' kari? Ewai', Esuweru amu' pen ni niri, 30 tikin ni riken Papa esi pi', ka'pon itun pi'pi iputurukasa' ananton apurito' wini miri awonsi'ki itun pi'pi iputurukasa' pen miri ri mari apurito' poro. 31 Apurito' pi' ken pe' si usauro' ni uya main, Mosi' winon para iye'to' pe ikupu? Pari pen ni! E'tane ru'ku, main awiri e'ni'nokon.

4

Epura'an Ekoneka'pu Apurito' Wini

1 I'ri ken si eporo'pu utamokori kon Epura'an uya seri rupi pi' ta seri? 2 Epura'an anansa' pe iyese yau ipokena' pe inkuu'pu wini, itapurito' ipi' esi miri—e'tane Papa rau pen. 3 I'ri ta imenukasa' itekare uya? “Epura'an uya Papa apuri'pu, miri pi' ipokena' pe iyese,” ta'pu ipi'.*

4 Ka'pon e'turawasoma a'tai, itepe'pu esi miri irepato' ike tukai' iyese pen ni e'tane iye'turawasomasa' ru'pu ipi' pe iyese. 5 E'tane ri, kari ka'pon te'turawasomasen pen pona e'tane Papa apurinin iri ka'pon anunnin ipokena' tukai', apurito' iya uya ikupu Papa uya ananto' pe

3:30 Isu'taronomi 6:4; Kare'siya 3:20 * 4:3 Iseneses 15:6; Kare'siya 3:6; v. 22 niri

ipokena' tukai'. ⁶ Tepi' uya miri ri mari ta isauroku a'tai ka'pon e'to' pi' pori' pe Papa uya anamu a'tai ipokena' pe iyesei tukai', inkupanu pikiri pen:

⁷ "Pori' pe kamo esi

iri to' nukuu'pu pi' usentu'man nisa' kon
miri awonsi'ki imakooi ton inipontisa' na'ne'
nan.

⁸ Pori' pe kari ka'pon esi

imakooi i'tuto' Itepuru uya pen ipi',"†

ta.

⁹ Seri pori' pe e'nito' pe' esi itun pi'pi iputurakasa' kon iwano' pe riken, miri pe para itun pi'pi iputurakasa' kon pen ni niri kati iwano' pe iyesei? Epura'an anamu'pu ipokena' tukai' apurito' iya pikiri ta pi' e'nisa'. ¹⁰ I'ri waraino ton o'noro seri e'kuu'pu? Itun pi'pi puturaka'pu tapo pe' iyesei'pu, miri pe para irawiri kati? Miri tapo pen e'tane miri rawiri! ¹¹ Miripan uya tayun pi'pi puturakato' eporo'pu ento' ipi' pe, Papa uya anansa' ipokena' pe enpoikanin pe apurito' iya wini, itun pi'pi puturakasa' pe para ri mari iyesei koro'tau. Miri pe iyesei pi', tanporon kon apurinin nan kaupanu pe iyesei e'tane itun pi'pi iputurakasa' kon pen, anansa' kon tato' pe to' pi'. ¹² Miri awonsi'ki itun pi'pi iputurakasa' kon kaupanu pe ri mari iyesei, itun pi'pi iputurakasa' kon pe riken to' esi pen e'tane tautisan ni mari apurito' pata'pu awiri ukupanu kon Epura'an enau iye'sa' ru'pu itun pi'pi puturaka rawiri.

¹³ Main poro Epura'an miri awonsi'ki imunki ama' uya iku'to' pe uya tukai' usauro'nisa' eporo'pu pen non ananto' iya, e'tane anan nito'

† 4:8 Eren 32:1-2 4:11 Iseneses 17:10

t̄uɣe'sen apurito' wini. ¹⁴ Ap̄une p̄ara kamoro t̄uko'mansan main awiri riken esi yau an̄n̄nin nan pe, apurito' esi miri itepe' pe p̄ara ri miri awonsi'ki iku'to' pe uya tukai' usauro'nisa' esi miri se pe ri, ¹⁵ ap̄une p̄ara main uya kota'man nito' nep̄. Miri awonsi'ki main p̄ara na'ne' airi main awiri p̄ara e'nito' p̄ara iyesi.

¹⁶ Miri pe iyesi pi', iku'to' pe uya tukai' usauro'nisa' uyep̄ apurito' wini, iye'ku'to' pe wak̄ nonkasa' wini, miripan e'kup̄ miri a'tai tanporo Ep̄ara'an munki am̄ pi'—kamoro riken main pi' te'san pen e'tane kamoro Ep̄ara'an uya apurito' pi' te'san ni mari. Tanporo uk̄ip̄n̄ kon pe iyesi.

¹⁷ Iye'menekasa' na'ne' kasa: “Ikonekasa' uya miri tu'kan kon t̄pataron kon k̄ip̄n̄ pe,” † tawon. Ep̄ara'an esi uk̄ip̄n̄ kon pe Papa enu yau, inapuri'n̄—Papa uko'man nito' t̄nin iyeri'sa' ena' miri awonsi'ki i'ri ri esa'nin moro ip̄ara ri iye'tane moro iyesi kasa.

¹⁸ E'ku'nito' ipi' p̄ara kasa ri iye'tane, te'ku'to' yau ri Ep̄ara'an uya apuri'p̄, miripan ena'p̄ tu'kan kon t̄pataron kon k̄ip̄n̄ pe, ta'p̄ na'ne' t̄pi' kasa ri, “Miri kasa kuru apayan n̄'san e'to' oton,” § tawon. ¹⁹ Apurito' t̄uya yau ti'si'm̄nka'n̄'se p̄ara, i'tu'p̄ iya ri t̄pun eri'sa' pe ri—ap̄une p̄ara 100 e'to' airi ri t̄w̄ipiyaai esi pi'—miri awonsi'ki Sera m̄are yen ni niri esi'p̄ iyeri'sa' pe. ²⁰ E'tane ri Papa uya ikup̄ t̄uya tukai' tauro'ka'p̄ apuri'p̄ iya, apurito' iya

4:13 Iseneses 17:4-6; 22:17-18; Kare'siya 3:29 **4:14** Kare'siya 3:18 **4:16** Kare'siya 3:7 † **4:17** Iseneses 17:5 § **4:18** Iseneses 15:5 **4:19** Iseneses 17:17

umeruntita'pɔ, miripan uya Papa apuripitu'pɔ,
 21 ipan pe ti'tui' Papa esi merunti ri ikupɔ tɔuya
 tukai' tɔusauroku'pɔ ku'nin ye'. 22 Miri wenai,
 "Papa uya anɔmu'pɔ ipokenan tukai'," tasa' iya.
 23 Main, "iku'to' esi'pɔ miri," tawon e'menuka'pɔ
 kari ri iwano' pe ri ken pen, 24 e'tane uri'nokon
 ni niri iwano' pe, anɔnsa' pe ipoken e'nito'
 e'ku'to' oton na'ne'—uri'nokon apuripi' na'ne' nan
 uyepuru kon Sises i'mɔ'sa'kasa' iya pi' eri'nito'
 apai. 25 Ituru'pɔ eri'nito' ya' umakooi kon wenai,
 miripan i'mɔ'sa'ka'pɔ iko'manto' ya' wakɔ pe
 ekonekan nito' pe Papa enu yau.

5

Tɔusewankamai' Pɔra Miri Awonsi'ki Pori' Pe E'ni

1 Miri pe iyese pi', apurito' poro Papa uya
 uyanɔnsa' kon ipokena' pe pi', usewankaman
 nito' pɔra iyese* Papa pokon pe e'ni pi' Sises Kɔrai,
 uyepuru kon poro, 2 iporo epoto' eposa' apurito'
 wini seri eke nonkasa' iya' iyau e'mɔ'sa'kan
 nisa'nokon na'ne'. Miri awonsi'ki epori'ma'nokon†
 ipokon pe Papa ku'to' eke pe yau e'ni'nokon
 pi' e'ku'nito' yau. 3 Miri kasa ri ken pen, e'tane
 epori'ma'nokon ni niri ekota'ma'nokon yau, apɔne
 pɔra i'tu'nokon ekota'man nito' uya sa'man awiri
 iku'to' enpa'ka; 4 sa'man awiri iku'to' uya, eseru
 wanni; miri awonsi'ki eseru wanni uya e'ku'nito'
 enpa'ka. 5 Miri awonsi'ki e'ku'nito' uya ika'ni' pɔra

4:25 Aisaya 53:4-5 * 5:1 usewankaman nito' pɔra iyese; miri
 pe pɔra, tɔusewankamai' pɔra e'nito' esa' pe e'ni'pai'nokon † 5:2
 epori'ma'nokon; miri pe pɔra, epori'manpai'nokon; v. 3 yau ri niri

ku'ni pen, apune p̄ra Papa uya t̄usi'n̄ankato' nonkasa' uyewan kon ya' Wak̄ A'kwar̄ wini, it̄usa' iya na'ne' uyena'nokon.

⁶ Menyat̄u, iweyu a'tai kuru sa'ne, imeruntir̄u p̄ra ri mari e'ni'nokon a'tai, K̄rai‡ erik̄'p̄u Papa uya tasa' pen awiron kon iwano' pe. ⁷ Iteseru pen ni in̄' ri erik̄ p̄ra iyesi ipokena' pe te'sen ka'pon iwano' pe, wak̄ ka'pon iwano' pe in̄' ri e'to' e'tane eri'pai itiwano' pe. ⁸ E'tane Papa uya ui'n̄ankato' kon t̄uya ya' ri enpoika wak̄ pe seri yau: T̄amakooikenan pe ri mari e'ni'nokon koro'tau, K̄rai erik̄'p̄u uiwano' kon pe.

⁹ Papa uya an̄n nisa' ipokena' pe pi' im̄n̄ wini, miri entai ri epika'tin nito' oton kon iporo Papa uya kota'man nito' apai! ¹⁰ Apune p̄ra, Papa eyaton pe e'nisa'nokon yau, itonpa pe enan nisa'nokon Imu eri'to' poro, miri entai nin si, itonpa pe enan nisa' epika'tito' oton iko'manto' poro! ¹¹ Seri riken ni esi pen miri kasa, e'tane epori'man ni mari Papa yau Sises K̄rai, uyepuru kon poro, iporo Papa tonpa pe enan nisa' eposa'nokon na'ne'.

Uma'tan Nito' Atan Poro, Uko'man Nito' K̄rai Poro

¹² Miri pe iyesi pi', makoi ewom̄'p̄u non pona tikin nan ka'pon poro na'ne' kasa kuru, miri awonsi'ki uma'tan nito' makoi poro, miri awonsi'ki seri na'ne' kasa uma'tan nito' uyee'p̄u tanporon kon ka'pon am̄' pona. Seri ta uya, apune p̄ra tanporon kon umakoitasa' pi'. ¹³ Main, Mosi' winon e't̄ur̄ rawiri, makoi esi'p̄u non po.

‡ 5:6 K̄rai; miri pe p̄ra, Me'saya; Papa Nan̄m̄'p̄u ta e'kwa pe; v. 8 yau niri. 5:12 Iseneses 3:6

E'tane makoi miri tato' p̄ra iyese main p̄ra na'ne' airi. ¹⁴ Miri nin si e'tane, uma'tan nito' e'sa' esa' wann̄i pe Atan si'kiri Mosi' p̄'k̄ pona, kamoro ri main ti'kw̄i'se, Atan kasa imakoitasa' kon pen ni esa' pe, t̄u'ye'ton ento' ipi' pe te'sen.

¹⁵ E'tane repan nito' ike esi iri ku'sa' Atan uya na'ne' warai pen ni. Ap̄ne p̄ra tu'kan kon eri'sa' pe iyese yau tikin nan ka'pon uya iri ku'sa' pi', miri entai Papa uya wak̄ nonkasa' miri awonsi'ki repan nito' tikin nan ni ka'pon, Sises K̄rai uya wak̄ nonkasa' wini iye'sa', tu'kan kon ni ka'pon am̄ uya eposa' eke pe kuru ri! ¹⁶ Repan nito' ike, kanan, esi pen tikin nan ka'pon, Atan umakoitasa' moron n̄'p̄ kasa: Eseru aimenkato' esi tikin nan makoi e'ma'p̄ka pi', miripan uya eno'man nito' nep̄; e'tane repan nito' uya tu'kan ni iri ku'pi'sa' e'ma'p̄ka, miripan uya an̄n nito' ipokena' pe nep̄. ¹⁷ Ap̄ne p̄ra tikin nan ka'pon uya iri ku'sa' wini, uma'tan nito' e'sa' esa' wann̄i pe yau k̄ri ri tikin nan ka'pon poro, miri entai kuru kamoro eke pe ri wak̄ Papa n̄nonka'p̄ eponin nan miri awonsi'ki an̄n nito' Papa uya ipokena' pe n̄t̄ar̄n̄ esi esa' wann̄i pe uko'man nito' yau tikin nan ni ka'pon, Sises K̄rai poro.

¹⁸ Miri moron n̄'p̄ pe, tikin nan ka'pon n̄kuu'p̄ iri moron n̄'p̄ pe tanporon kon ka'pon am̄ eno'mato' esi'p̄ kasa, miri kasa ri mari tikin nan Papa maimu awiri e'n̄ito' ku'sa' moron n̄'p̄ esi'p̄ an̄n ni Papa uya ipokena' pe uko'man nito' ne'nin pe tanporon kon ka'pon am̄ iwano' pe. ¹⁹ Ap̄ne p̄ra tikin nan ni ka'pon e'sa' pi' main awiri p̄ra iporo tu'kan kon ni ena'p̄ t̄makooikena' nan pe, miri kasa ri mari tikin nan

ni ka'pon esi pi' main awiron pe tu'kan kon ni anɛmɛ Papa uya ipokena' ton pe.

²⁰ Main e'tonpa'ti'pɛ iri e'kupɛ epanto' pe. E'tane makoi epansa' yau, wakɛ nonkasa' epansa' mi-yari ri, ²¹ makoi esi'pɛ na'ne' kasa esa' wannɛ pe uma'tan nito' yau, miri kasa ri mari wakɛ nonkasa' e'to' pe esa' wannɛ pe Papa uya anɛn ni ipokena' pe poro tiwiro' ri uko'man nito' ne'nin pe Sises Kɛrai, uyepuru kon poro.

6

Eri'nisa' Makoi Ya', Nurine E'ni Kɛrai Yau

¹ I'ri ken si ta'nokon seri, miri a'tai? Umakoi-tan pi' ri e'ni'nokon, wakɛ nonkasa' epanto' pe? ² Kane ku! Uko'man nito' iri yau eri'sa'; nai kasa iyau ri mari uko'man ni pi' e'ni? ³ Miri pe pɛra, i'tu auya'nokon pɛra kati iyese uri'nokon tanporo iyepa'taisimasa' kon Kɛrai Sises ya' epa'taisima'pɛ ima'tato' ya'? ⁴ Iye'u'na'tisa' pe ri e'ni'pɛ'nokon; miri pe iyese pi', ipokon pe epa'taisiman nito' poro uma'tan nito' ya', Kɛrai e'mɛ'sa'ka'pɛ teriku'pɛ apai kasa kuru eke pe Ikuipɛnɛ ku'to' poro, uri'nokon ni niri uko'manto' pe iyese emenna' uko'man nito' yau.

⁵ Ima'tato' yau ipokon pe uta'si'nisa' yau, ipokon pe kuru ri mari uta'si'ni'nokon miri iye'mɛ'sa'kato' yau. ⁶ Apɛne pɛra i'tu'nokon pena e'nito' eseru pokapitɛ'pɛ kurusu' pona ipokon pe makoi pun enato' pe i'si'mɛra,* makoi poitorɛ ton pe pɛra e'nito' kon pe— ⁷ apɛne pɛra iyeri'sa' pe na'ne' emo'kasa' makoi apai.

6:4 Koro'se 2:12 * **6:6** i'si'mɛra; miri pe pɛra, eno'mato' kon pe

⁸ Eri'nisa' pe iyesi yau Kurai pokon pe, apuri'nokon ipokon pe ri mari uko'man ni'nokon tukai'. ⁹ Apune p̄ra i'tu'nokon pi' Kurai e'mu'sa'kasa' pi' eri'nisa' apai, iyeri'kapu pen kanan; itentai uma'tan nito' esi pen. ¹⁰ Uma'tan nito' iyeriku'p̄ na'ne' yau, iyeriku'p̄ makoi ya' tikin ite'kwa t̄nakonomaton pe p̄ra ri; e'tane si iko'manto' n̄ako'manu'ai'ne', iko'mamu Papa iwano' pe i'se iye'to' awiri.

¹¹ Miri kasa si, isi'tuti' iri yau iuko'manto' kon eri'sa' pe e'tane nurine Papa iwano' pe Kurai Sises yau. ¹² Miri pe iyesi pi', makoi k̄se'nin t̄uma'tasen ipun kon esa' pe iri i'se iye'to' awiri iwesi kon pa. ¹³ Ipun kon p̄'ku ri k̄'tutu makoi ena', iri ku'to' ike pe, e'tane e'tuti' ru'ku Papa ena', kamoro uma'tan nito' apai uko'man nito' ya' iyera'tisa' kon pe; miri awonsi'ki ipun kon p̄'ku ituti' itena' ipoken e'nito' ku'to' ike pe. ¹⁴ Apune p̄ra makoi e'to' pe p̄ra iyesi iyepuru kon pe, apune p̄ra main o'no iwesi kon pen, e'tane waku nonkasa' o'no.

Ipoken E'nito' Poitoru Pe E'ni

¹⁵ Miri a'tai si, i'ri ken? Umakoita'nokon ken pe' si apune p̄ra main o'no p̄ra e'ni pi' e'tane eke waku nonkasa' o'no e'ni pi'? Kane ku! ¹⁶ I'tu auya'nokon p̄ra pe' iyesi iye'tusa' kon a'tai ka'pon ena' imaimu awiri iwesi kon pa ipoitoru ton pe, imaimu awiri iwe'to' kon poitoru pe iwesi kon? Makoi poitoru pe iwesi kon yau, uma'tan nito' ya' anin, miri pe p̄ra main awiri e'nito' ya', ipoken uko'man nito' ya' anin. ¹⁷ E'tane tenki tapai'nokon Papa pi', makoi poitoru pe ri iwe'pi'sa' kon e'tane,

tanporo iyewan kon pokon pe iyenufato' kon awiri iwe'sa' kon iye'tusa' kon na'ne' ya'. ¹⁸ Makoi apai iyemo'kasa' kon; ipoken e'nito' Papa enu yau poitoru pe iyenasa' kon.

¹⁹ Ka'pon pe e'nito' yau ekama uya apune para i'si'mara a'naino kon iyaseru kon yau iwesi kon pi'. Ipun kon pu'ku tupa'pu auya'nokon kasa kuru iri poitoru pe, eke pe ri tepansen iri ena', miri kasa si itati' ipoken Papa enu yau poitoru pe e'nito' ya', waku pe iwesi kon pa. ²⁰ Makoi poitoru pe iwesi kon a'tai, ipoken te'sen Papa enu yau ku'to' auya'nokon para ri iyesi'pu. ²¹ I'ri ken si waku mepota'tui miri a'tai seri pe ipi' si mipiyi'atui'ne' apai? Miri ton moron nu'pu esi uma'tan nito'! ²² E'tane nin si, iyemo'kasa' kon pi' makoi apai miri awonsi'ki Papa poitoru pe nin si iyenasa' kon, waku si ineporonu kon esi ayanin kon waku pe e'nito' ya', miripan moron nu'pu esi inke ri uko'man nito'. ²³ Apune para makoi epe'pu esi uma'tan nito', e'tane Papa e'repatu' ike esi inke uko'man nito' Kurai Sises, uyepuru kon poro.†

7

Ento' Ipi' Emari'man Nito' Apai

¹ I'tu auya'nokon para pe' nai, utonpa ton—ka'pon amu' main, Mosi' winon i'tunin nan auro'ka uya seri—merunti pe ka'pon pi' main esi iko'mamu pu'ku pona riken? ² Ento' ipi' pe, iyemari'masa' uri'san utauronsa' miri tutaan'pu pona nurine iyese koro'tau, e'tane itaan'pu eri'sa' yau, iyemo'kasa' nin si miri emari'man nito' ku'nin

† 6:23 poro, miri pe para yau

main apai. ³ Miri a'tai nin si, taron ni warawo' ya iyemari'masa' yau nurine ri tutaan'pu esi koro'tau, tekumasen temari'masa' e'tane ta miri ipi'. E'tane itaan'pu eri'sa' pe iyese yau, iyemo'kasa' miri main apai, miripan esi tekumasen temari'masa' e'tane tato' ipi' pe para, taron ni warawo' mari'ma tane iya ri.

⁴ Miri kasa si, utonpa ton, imiri'nokon ni niri main yau iuko'manto' kon apai iyeri'sa' kon Kurai pun poro, taron ni iwano' pe iwesi kon pa, kuri iye'mu'sa'kasa' ru'pu teriku'pu apai, Papa iwano' pe epetan nito' pe. ⁵ Apune para u'naino kon umakooi kon* esi a'tai uyesa' kon pe, iri inku'pai e'nito' upakasa' main wini esi'pu e'tarawasoman pi'upun kon yau, miri si epetan ni'pu uma'tan nito' iwano' pe. ⁶ E'tane seri pe nin si, uyauron nin nu'pu kon ya' eri'ni wini, emo'kan nisa' main apai emenna' Iya'kwaru eseru yau iyapiyo' pe e'nito' kon pe, miri awonsi'ki penaro' iye'menukasa' main awiron pen ni.

Makoi Ya' E'suran Man

⁷ Iri ken si ta'nokon seri, miri a'tai? Makoi pe pe' main esi? Ta pen ni! I'nai ri, makoi miri tukai' si'tui'no pen ni, e'tane main poro nin i'tusa' uya. Apune para si'tui'no pen ni tonpa iwano' i'se e'nito' ipan pe, main uya, "Itonpa iwano' i'se kesii ipan pe,"† tasa' para iyese yau. ⁸ E'tane makoi, iku'to' uya iwini ta'sii' apiyontin nito' wini, uya uyau tanporon ni i'se ipan pe esi ku'sa'. Apune para main para iyese a'tai, makoi esi iyeri'sa' pe. ⁹ Pena

* **7:5** umakooi kon; miri pe para, ipun; v. 25 yau ri niri † **7:7** E'sotas 20:17; Isu'taronomi 5:21

nurine iye'sa' ru'pu uri main para iyese a'tai; e'tane apiyontin nito' uye'sa' a'tai, makoi usenpoika'pu, ¹⁰ miri awonsi'ki eriku'pu si. I'tu'pu uya miri ri si miri main uko'man nito' ne'nin pe iku'sa' uya ri uma'tan nito' kuru ri nee'pu.

¹¹ Makoi uya apiyontin nito' apurisa' miripan uya uyenku'tisa' uya uwisa' miri main poro. ¹² Miri pi', main esi waku pe, miri awonsi'ki apiyontin nito' esi waku pe, ipokena' pe, miri awonsi'ki waku pe. ¹³ Miri ken pe' si waku pe te'sen ena'pu miri upona uma'tan nito' pe? Kane ku! E'tane makoi e'to'ka'na'to' pe makoi pe, uma'tan nito' ku'sa' iya uyau waku pe te'sen poro ri, main uya apiyontin nito' poro makoi enato' pe ti'tusen pe iri pe kuru ri.

¹⁴ I'tu'nokon main esi Papa A'kwaru winon pe; e'tane uri esi Iya'kwaru pikiron pe para, ikurupo'pomasa' pe makoi poitoru pe. ¹⁵ Unkupunu i'tu uya para ri iyese, apune para inku'pai e'to' kupu uya para iyese, e'tane uyewaruma kupu uya. ¹⁶ Miri awonsi'ki, inku'pai para e'to' kupu uya yau, waku pe main esi ta uya ri. ¹⁷ Iyese na'ne' kasa, uri pe iyese pen naku'ai'ne', e'tane makoi uyau nako'manyai'ne'. ¹⁸ I'tu uya waku uko'mamu para iyese uyau, miri na'ne' u'naino ipan makoi yau.‡ Apune para waku pe na'ne' inku'pai esi, e'tane ari uya para iyese. ¹⁹ Apune para siku'ai'ne' esi waku inku'pai e'to' pe para; iri, inku'pai para e'to' kupu uya—seri kupu pi' ri uko'mamu. ²⁰ Seri si inku'pai e'to' pen kupu

7:11 Iseneses 3:13 **7:15** Kare'siya 5:17 ‡ **7:18** makoi yau; miri pe para, upun yau

uya yau, uri uya ikup_u pen, e'tane makoi uyau n_uko'manyai'ne' uya ikup_u.

21 Miri kasa si, seri main e't_urawasoma pe i'tusa' uya: Wak_u inku'pai esi a'tai, iri esi miri moro upiyau. 22 Uyau Papa iwano' main pi' tepori'masen uri; 23 e'tane t_uron ni main e't_urawasoma ene uya upun p_u'k_u ton yau, usenuminkato' iwano' main pokon pe usewa'noma kup_u iya, miripan uya ukoneka main iwano' makoi na'si'p_u pe, te't_urawasomasen upun p_u'k_u ton yau. 24 Pokoi ri sa'ne uri! In_u' uya upika'ti seri uma'tan nito' meruntir_u apai uyau e't_urawasoman pi' na'ne'? 25 Tenki ta Papa pi'—Sises K_urai, uyepuru kon poro!

Miri pi' si, uri ri usenuminkato' yau esi Papa iwano' main poitor_u pe, e'tane u'naino makoi yau makoi iwano' main poitor_u pe esi.

8

Uko'man Nito' Iya'kwar_u Poro

1 Miri pe iyese pi', kamoro K_urai Sises yau na'ne' nan eno'mato' p_ura iyese seri pe,* 2 ap_une p_ura K_urai Sises poro uko'man nito' A'kwar_u iwano' main uya umo'kasa'† makoi miri awonsi'ki uma'tan nito' iwano' main apai. 3 Ap_une p_ura main, Mosi' winon esi'p_u na'ne' i'si'm_ura ikup_u iya p_ura, i'naino makoi‡ uya a'tu'm_unka'n_u'sa'

* **8:1** T_uron ni ton emen imenukasa' ton uya iponantipi'sa', t_uko'mansan i'naino makoi awiri p_ura e'tane a'kwar_u awiri, † **8:2** umo'kasa'; t_uron ni imenukasa' ton yau, imo'kasa' kon; t_uron ni ri mari yau, umo'kasa' kon ‡ **8:3** i'naino makoi; miri pe p_ura, ipun; v. 4-5, 8-9, 12 yau ri miri

ke, Papa uya ikuu'pɥ tiwano' tɥmu tenno'se tɥmakooikenan ka'pon kasa makoi mo'kanin pe tɥtɥsen pe. § Miripan uya makoi eno'ma'pɥ tɥmakooikenan ka'pon yau,* 4 ipokena' pe e'ni i'se main e'to' e'seposa' e'to' pe eke pe uyau'nokon, u'naino kon umakooi kon pikiri tɥuko'mansan pe pen e'tane uri'nokon Iya'kwarɥ pikiri tɥuko'mansan.

5 Kamoro tɥuko'mansan ti'naino kon tɥmakooi kon awiri uya tɥusenuminkato' kon tɥsa' miri ti'naino kon e'to' i'se pona; e'tane kamoro tɥuko'mansan Iya'kwarɥ awiri uya tɥusenuminkato' kon tɥsa' miri Iya'kwarɥ e'to' i'se pona. 6 Tɥmakooikenan ka'pon usenuminkato'† esi uma'tan nito', e'tane Iya'kwarɥ e'to' itesa' pe te'sen usenuminkato' esi uko'man nito' pe miri awonsi'ki usewankaman nito' pen; 7 apɥne pɥra tɥmakooikenan usenuminkan nito'‡ esi isi pe Papa pi'. Papa iwano' main ya' iye'tɥɥ pɥra iyese, miri kupɥ iya poken pɥra ri niri iyese. 8 Kamoro to' i'naino makoi e'to' itesanon pe uya Papa pori'ma poken pɥra ri iyese.

9 E'tane ri, imiri'nokon a'naino kon amakooi kon esi pen iyese' kon pe, e'tane Iya'kwarɥ, Papa A'kwarɥ uko'mamɥ yau ayau'nokon. Miri awonsi'ki inɥ' ri esi yau Kɥrai A'kwarɥ esa' pe pɥra, Kɥrai iwano' pe pɥra ri iyese. 10 E'tane ayau'nokon

§ 8:3 makoi mo'kanin pe tɥtɥsen pe; miri pe pɥra, makoi iwano' pe * 8:3 tɥmakooikenan ka'pon yau; miri pe pɥra, ipun yau † 8:6 Tɥmakooikenan ka'pon usenuminkato'; miri pe pɥra, Usenuminkan nito' e'tɥsa' pun pi' ‡ 8:7 tɥmakooikenan usenuminkan nito'; miri pe pɥra, usenuminkan nito' e'tɥsa' pun pi'

Kurai esi yau, ipun kon esi iyeri'sa' pe apune para makoi esi pi', e'tane aya'kwaru kon esi nurine apune para Papa uya ayanumu kon pi' ipokena' ton pe. ¹¹ Miri awonsi'ki Sises i'mu'sa'kanin nu'pu iyeriku'pu apai A'kwaru uko'mamu yau ayau'nokon, kuri ri Kurai i'mu'sa'kanin nu'pu iyeriku'pu apai uya ri mari tumata'sen ipun kon repa miri iko'manto' ke Ta'kwaru poro, ayau'nokon nako'manyai'ne'.

¹² Miri pe iyese pi', utonpa ton, unkurunu kon kuru esi—e'tane u'naino kon umakooi kon pi' pen, tumo'mansan pe iteseru awiri pen. ¹³ Apune para iuko'mamu kon pe iyese yau a'naino kon amakooi kon awiri, iyeriku kon; e'tane Iya'kwaru wini ipun nukuru'pu ipoken para tusa' auya a'tai ima'tato' ya', iuko'mamu kon ni, ¹⁴ apune para kamoro, Papa A'kwaru narinu ton esi Papa munki pe pi'. ¹⁵ Apune para iya'kwaru eposa' auya'nokon para iyese enari'ke' pe e'ni poitoru pe kanan iwesi kon pa pen, e'tane Iya'kwaru eposa' auya'nokon imunki pe ikonekanin kon, § miripan wini, “Apa,* Papai,” ta'nokon. ¹⁶ Iya'kwaru uya ekama tiwano' pe uya'kwaru kon pokon pe, uri'nokon esi Papa munki pe tukai'. ¹⁷ Seri si munki pe e'ni'nokon yau, inturu anunnin pe e'ni — Papa nuru anunnin pe miri awonsi'ki Kurai nanumu inturu anunnin pe iya'kiri, i'nai ri iyekota'mato' yau e'nisa' yau, eke pe iku'to' yau ri mari e'nito' pe.

8:11 1 Koren 3:16 § **8:15** imunki pe ikonekanin kon; miri pe para, tumunki pe imo'kanin kon * **8:15** Apa; Arami' maimu, Papai ta e'kwa pe. **8:15** Ma' 14:36; Kare'siya 4:6 **8:17** Kare'siya 4:5-7

Seri Enta' Eke Pe E'nito'

¹⁸ Usenuminka seri pe ekota'man na'ne' esi uri'nokon yau tausenkoika ton Papa uya ikupu wini eke pe iku'to' kaisa ri i'nanke' pe iyesi pen ni. ¹⁹ Ika'sa' kon enuriku tenu ke esii'ma Papa munki amu' usenkoika enupikiri. ²⁰ Tanporo ika'sa' ton ko'manuku'pu itiwano' pe ika'sa' epoto' iya piyapai, iko'manpai iyesi pi' pen. Seri e'kuu'pu iye'moronkato' pe ku'nin nu'pu poro, te'ku'se ²¹ ika'sa' kon ni emo'kato' pe ma'tanu'nin meruntiru'apai, iyemo'kasa' kon Papa munki pe eke pe te'ton kon pe.

²² I'tu'nokon tanporo ika'sa' kon a'numu mure entunuku pi' e'ni kasa seri pu'ku pona ri. ²³ Miri kasa riken pen, e'tane uri'nokon ni niri, iyepiya'ti pe te'sen Waku A'kwaru eponin nu'san ni a'numu u'nau'nokon enuriku tenu ke esii'ma uyananto' kon pi' imunki pe, upun kon e'mato'. ²⁴ Apune para seri e'ku'nito' yau epika'tin nisa'. E'tane e'ku'nito' tensen pe na'ne' esi e'ku'nito' pe para kuru ri. Inu' ken te'ku'sen tenawon pi' ri? ²⁵ E'tane e'ku'ni pe iyesi yau uyenu'nokon para na'ne' pi', itenupikiri e'ni miri tause'takai' para.

²⁶ Miri kasa ri, Iya'kwaru uya upika'ti kon i'si'mara e'nito' yau. Ipareman nito' i'tu'nokon para iyesi, e'tane Iya'kwaru ri iparema upona'nokon ta'nanse main uya ekama poken para ri. ²⁷ Miri awonsi'ki kari uyewan kon warinpanin uya Iya'kwaru usenuminkato' i'tu, apune para Iya'kwaru iparema waku ton Papa nukupu'san pona Papa e'to' i'se awiri.

Entakanin Nan Entai Ri

²⁸ Miri awonsi'ki i'tu'nokon tanporon yau ri Papa e'tarawasoma wak_u pe ti'n_uankanin ku'nin pe,† iki'masa' kon mirito' pe ta'p_u t_uuya awiri.‡

²⁹ Kamoro iwano' pe Papa uya wapiya i'tu'p_u pena kanan to' koneka'p_u iya T_umu kasa to' e'to' pe iwaraino kon pe, eke kuru iye'ka'sa' kon entaino pe wapiyaro' t_umu pe tu'kan kon tonpa ton koro'tau. ³⁰ Kamoro si pena t_unkoneka'san, to' ki'masa' iya ri mari; kamoro t_unk_i'ma'san, an_um_u iya ipokena' pe; kamoro t_unan_um_u'san ipokena' pe, kup_u iya eke pe ri mari.

³¹ I'ri ken si ta seri ei'nin pe? Papa esi pe iyesi yau uwenai'nokon pe, in_u' ken si esi uyewa'nomanin kon pe? ³² K_uri ri T_umu teme'nin n_u'p_u pen, e'tane inonkanin n_u'p_u tanporon kon uri'nokon iwano' pe—nai kasa ken uri'nokon repa iya p_ura nesii'no ipokon pe wak_u pe ri tanporon ke ri?

³³ In_u' uya niri ken Papa nan_um_u'san pi' iri ton ta? Papa k_uri ri an_unnin ipokena' pe. ³⁴ In_u' k_uri eno'manin? K_urai Sises, iyeri'sa' r_u'p_u—miri entai, iye'm_u'sa'kasa' r_u'p_u uko'man nito' ya'—esi na'ne' Papa emiyat_u enwo'net_u wini, uri'nokon pona ri niri ip_ureman pi' te'sen. ³⁵ In_u' uya pantakan K_urai uya ui'n_unkato' kon apai? I'ri uya kati, usewankaman nito' uya, sa'man yau e'nito' uya, miri pe p_ura iwenai p_ura kota'man nito' uya miri pe p_ura

† **8:28** T_uron ni imenukasa' ton yau, i'tu'nokon tanporon ni e'tarawasoma a'sam_ut_u yau wak_u ku'nin pe kamoro Papa i'n_uankanin nan pi' ‡ **8:28** e'tarawasoma wak_u pe ti'n_uankanin ku'nin pe, iki'masa' kon mirito' pe ta'p_u t_uuya awiri; miri pe p_ura, e'tarawasoma a'sam_ut_u yau kamoro i'n_uankanin nan pokon pe wak_u pe te'sen ne'nin pe—kamoro iki'masa' kon pokon pe mirito' pe ta'p_u iya awiri.

iwankan uya, miri pe p̄ra ipon p̄ra e'nito' uya, miri pe p̄ra isi yau e'nito' uya, miri pe p̄ra supara uya kati? ³⁶ Iye'menukasa' na'ne' kasa:

“Imiri'nokon epika'tito' pe uma'tan nito' yau ina esi pata tuko'manu'se;

karimeru am̄' iwito' kon pe iku'sa' kon kasa ri ina esi,”§

tawon.

³⁷ Kane, tanporo seri ton yau'ne e'ni'nokon entakanin nan entai kuru ri, k̄ri ui'nunkanin kon poro. ³⁸ Ap̄ne p̄ra apurisa' uya uma'tan nito' miri pe p̄ra uko'man nito', inseru am̄' ri miri pe p̄ra makoi am̄' ri, * seri pe na'ne' miri pe p̄ra seri enta' na'ne', miri pe p̄ra i'ri ri merunti ri, ³⁹ ka'tawon ni miri pe p̄ra i'nawon ni, miri pe p̄ra i'ri ri tanporo ika'sa' yawon, uya pantakan p̄ra ri iyese Papa uya i'nunkan nito' apai K̄rai Sises, uyepuru kon yau na'ne'.

9

Eke Pe Kuru Tesi Pi' Papa Uya An̄n Nito'

¹ I'nairon pe usaurok̄ K̄rai yau—kasi pe esi pen, uya'kwaru uya apitanuk̄ Wak̄ A'kwaru yau—² eke pe kuru ipan pe upokoitato' man miri awonsi'ki iyereuta p̄ra uyewan yau upokoitato' esi. ³ Ipa'n̄sa' pe miri awonsi'ki imo'kasa' pe K̄rai piyapai esi i'se e'ai', utonpa ton pika'tinin pe, kamoro kuru t̄ponaron kon upokon pe, ⁴ ka'pon am̄' Esuweru pon kon. To' iwano' pe munki wanni pe to' an̄sa' esi; to' iwano' pe ri Papa a'kwarii esi, to' iwano' pe ri ekonekan nito'

§ 8:36 Eren 44:22 * 8:38 makoi am̄' ri; miri pe p̄ra, ka' epuru ton

esi, to' iwano' pe ri main eporo esi, to' iwano' pe ipareman nito', use'man nito' iwua' tau Papa apuripi'to' esi miri awonsi'ki ikupua uya tasa' ru'san esi, to' iwano' pe. ⁵ To' iwano' pe ruko' amua' tipiya ton esi, miri awonsi'ki Kurai ka'pon pe te'to' wini u'tisa' to' apai, Papa, tanporon ni epoino, tiwiri ri apuripitu nesii!* Amen.

⁶ Papa Maimu ipareme'sa' kasa iyese pen. Apune para tanporon kon Esuwerua apai iu'tisa' kon esi pen Esuwerua pe. ⁷ Ipayan nu'san pe ri to' esi pi' tanporo Epura'an munki pe to' esi pen. E'tane miri kasa para kuru ri; "Aisi' poro imunki amua' e'seporo miri,"† tasa'. ⁸ Turon ni pe tato' yau, ka'pon i'naino kon‡ esi pen Papa munki pe, e'tane ikupua uya tukai' usauro'nisa' munki ton esi Epura'an munki pe. ⁹ Apune para se kasa ikupua uya tawon usekama'pu: "Iweyu pe iku'sa' ru'pu a'tai§ enna'po, miri a'tai Sera e'to' oton tamare ke,"* tukai'.

¹⁰ Miri riken pe para, e'tane Rupe'ka munki amua' esi'pu tikin ni ikupuanu miri awonsi'ki kuri ri ri to' kuiruanu pe uri'nokon tamokorii, Aisi'. ¹¹ Miri ri e'tane, munui' amua' entu rawiri miri pe para i'ri ri waku miri pe para iri kupua to' uya rawiri—

9:4 E'sotas 4:22 * **9:5** Kurai ka'pon pe te'to' wini u'tisa' to' apai, Papa, tanporon ni epoino, tiwiri ri apuripitu nesii! miri pe para, Kurai, tanporon ni entaino. Papa apuripitu nesii tiwiri ri! miri pe para, Kurai, Papa tanporon entaino ri apuripitu nesii tiwiri ri! † **9:7** Iseneses 21:12 ‡ **9:8** ka'pon i'naino kon—Epura'an payan Esimerua, Ekarua mare poron kon pi', ta seri uya. (Apune Kare'siya Pon kon 4:22-23 enki.) § **9:9** Iweyu pe iku'sa' ru'pu a'tai; miri pe para, Seri a'tai ne'sepoyai'ne' wai'piya yau * **9:9** Iseneses 18:10, 14

moro Papa uya ananto' mirito' pe tukai' e'to' esi'pua:
 12 tarawaso wini pen e'tane kari iki'manin wini—
 ta'pua ipi', "Iru'i e'to' oton takon apiyo' pe,"† ta'pua.
 13 Iye'menukasa' na'ne' kasa: "Seko' i'nunkasa'
 uya, e'tane I'sa ewaruma'tisa' uya,"‡ tukai'.

14 I'ri ken si ta miri a'tai? Iri pe pe' Papa esi ta?
 Pen kuru ri! 15 Apune para Mosi' pi' ta iya,
 "Isentu'mapai ri e'to' ipi' pi' usentu'ma,

aiko kapai ri e'to' ipi' pi' aiko ta uya,"§
 tasa' iya. 16 Miri pi' si ka'pon e'to' i'se pi'
 miri pe para inkuu'pua pi' iyese pen, e'tane
 Papa usentu'mato' pi' iyese. 17 Apune para
 iye'menukasa' itekare uya ta, Peero pi':
 "I'mu'sa'kasa' uya serito' pe, umeruntiru
 enpoikato' pe uya ayau miri awonsi'ki uyese'
 usekamato' pe tanporo non yau,"* ta iya. 18 Miri
 pe iyese pi', Papa esi tausentu'masen isentu'mapai
 te'to' ipi' pi' ri, miri awonsi'ki ansa'mantanu'pai
 te'to' ri sa'mantanuku iya.

19 Itonpa kon uya ta upi': "I'ri pe ken si iyese
 pi' Papa uya upona'nokon eno'ma? Inu' uya ite-
 seru wa'kutu?" ta. 20 Aiko si, ka'pon. Inu'
 imiri Papa Maimu ei'pitu pa? "Inkaa'pua uya pe'
 ta miri taka'nin nu'pua pi', 'I'rito' pe uka'sa' auya
 se kasa?" † ta? 21 Iini ka'nin pe' e'to' pe para
 tameruntiru yau iyese miri ri iini pun ke eke pata
 weyu a'tai tapurisen miri awonsi'ki taweyu ke
 para ri tapurisen ka'nin pe?

22 I'ri pe iyese Papa uya anansa' pe iyese
 yau kota'man nito' enpoikato' pe tauya miri

† 9:12 Iseneses 25:23 ‡ 9:13 Mara'kai 1:2-3 § 9:15 E'sotas
 33:19 * 9:17 E'sotas 9:16 (LXX) † 9:20 Aisaya 29:16; 45:9

awonsi'ki tumeruntiru usi'tuto' pe, uya imoronka tūseta'kai' para kota'man nito' ton ipi'— iyekonekasa' kon tūuma'tato' kon pe? ²³ I'ri pe iyesi seri ku'sa' iya yau eke pe tuku'to' ipi' usi'tuto' pe tūsentu'mato' ton ipi', inkoneka'san pena eke pe to' e'to' pe— ²⁴ uri'nokon ni, inki'ma'san ni mari, Esuweru amu' apai riken pen, e'tane Esuweru amu' pen piyapai ri mari? ²⁵ Oseya yau ta pi' na'ne' kasa:

“ ‘Umunki,’ ta uya to' pi' umunki amu' pen ni pi';
miri awonsi'ki ‘Ui'nun,’ ta uya ipi' ui'nun pen
ni pi' ” ‡

ta, ²⁶ miri awonsi'ki,

“Iye'ku'to' oton to' pi',

‘Umunki amu' pen ni imiri'nokon,’ ta'pa yau
kuru ri,

‘Papa, tūuko'mansen munki amu',’ tato' oton to'
pi' ” §

tasa' iya.

²⁷ Aisaya uya Esuweru ekare'ti uki'pi'namu:

“Esuweru amu' tu'kanoro e'tane ri parau e'pi pon
wi'si' kasa ri,
tu'ke para to' tonpa'san epika'tito' oton.

²⁸ Apune para Itepuru uya

iyekota'mato' ya' non turu inke para miri
awonsi'ki i'ri kupu poken para, ” *

ta.

²⁹ Aisaya uya wapiya ekamasa' na'ne' kasa:

“Itepuru merunti pe kuru te'sen ye' uya riken
upayan kon para unonkasa' kon yau,
Satan kasa ena'nokon nesii'no,

‡ 9:25 Oseya 2:23 § 9:26 Oseya 1:10 * 9:28 Aisaya 10:22-23

miri awonsi'ki Komora kasa e'ni'nokon ne-
sii'no,"†
tukai'.

Esuweru Amu' Apurinin Nan Pen

³⁰ Fri ken si ta miri a'tai? Esuweru amu' pen, ipoken e'nito' ku'nin nu'san pen, uya si eposa', tananto' kon ipokena' pe apurito' wini teposen; ³¹ e'tane Esuweru amu', main ipoken e'nito' ku'nin nu'san, uya eposa' para iyesi. ³² Fri pe iyesi pi'? Apune para to' uya ikuu'pu apurito' iyawiri para, tarawaso wini iyesi tato' pe ri. To' e'pi'po'pu "e'pi'pon nito' ti" pona. ³³ Iye'menukasa' na'ne' kasa:

"Enti', inonkasa' uya Sayan po, ti', ka'pon amu' e'pi'poto' ipona
miri awonsi'ki, ti', to' eno'manin,
miri awonsi'ki kari, kari ri si apurinin pe te'sen
ipiyi'to' oton pen,"‡
tukai'.

10

¹ Utonpa ton, uyewan e'to' i'se miri awonsi'ki iparemato' Papa pi' esi Esuweru amu' epika'tito' pe. ² To' pi' ri usauroku Papa i'tuto' tauya'nokon pi' kuru ri ipan pe to' e'tusa' tukai', e'tane to' e'to' ipan pe e'tapai esi Papa i'tuto' pi' pen ni. ³ To' uya Papa uya anun nito' ipoken e'nito' ya' ku'sa' se pe ri pi', miripan kon e'warinpasas' tiwano' kon ni nin ipoken e'nito' inkonekapai, to' e'tusa' para iyesi Papa uya anun nito' ipoken e'nito' pe ya'. ⁴ Kurai esi

† 9:29 Aisaya 1:9 ‡ 9:33 Aisaya 8:14; 28:16

main, Mosi' winon u'ma'sa' pe ri,* tanporon kon ni apurinin nan iwano' pe Papa uya anan ni ipokena' pe e'nito' ya'.

⁵ Mosi' uya ekama se na'ne' kasa ipoken e'nito' esi main wini: “Ka'pon seri ton ku'nin uko'mamu miri ton wini,”† ta. ⁶ E'tane Papa nanamamu ipokena' pe e'nito' ya' apurito' wini te'sen uya ta: “Kukai iyewan yau, 'Inu' enuku Epan pona?‡” kukai ta (Kurai nu'tinin pe ta e'kwa pe), ⁷ “miri pe para, 'Inu' u'ti seri i'nawon ya'?§” kukai ta (Kurai aru'nu'nin pe eri'nisa' apai ta e'kwa pe). ⁸ E'tane i'ri ken si ta Mosi' uya? “Main esi a'ko pe ipiyau; anta nau iyese miri awonsi'ki iyewan yau,”* ta iya, apurito' maimu si ina nekamayai'ne': ⁹ Anta ke ekama auya yau, “Sises esi Epuru wanni,” tukai', miri awonsi'ki apuri'ma iyewan yau Papa uya i'ma'sa'ka'pa iyeri'sa' apai, iyepika'ti ri. ¹⁰ Apune para iyewan pokon pe apuri auya miri awonsi'ki iyekoneka, miri awonsi'ki anta ke ekama auya miri awonsi'ki si iyepika'ti. ¹¹ Imenukasa' itekare nikayai'ne' kasa, “Kuri apuri pi' na'ne' ipiyi'to' para ri iyese,”† nikayai'ne'. ¹² Apune para Esuweru amu' esi taron ni pe Esuweru amu' pen kasa para tato' para ri iyese—kuri ri ri epuru esi tanporon kon epuru pe, miripan uya eke pe ri waku turu tanporon kon tesa'nin nan pona, ¹³ apune para, “Tanporon kon Itepuu ese' esa'nin nan epika'tito' oton,”‡ tasa' iya.

* **10:4** Kurai esi main, Mosi' winon u'ma'sa' pe ri; miri pe para, Kurai esi main, Mosi' winon a'ku'tisa' pe ri † **10:5** Ripaiti'kas 18:5
 ‡ **10:6** Isu'taronomi 30:13 § **10:7** Isu'taronomi 30:13 * **10:8** Isu'taronomi 30:14 † **10:11** Aisaya 28:16 ‡ **10:13** Isoweru 2:32

14 Nai kasa ken tɔnapurinu kon pen ni esaku'i'no to'? Miri awonsi'ki, nai kasa ken i'ri ri tɔneta'pu kon ipi' pen ni apuri'i'no to'? Miri awonsi'ki, nai kasa ken to' uya eta, inu' uya ri itekare ekama tane pu'ra ri to' pi'? 15 Miri awonsi'ki, nai kasa ken itekare ekama to' uya tenno'sa' kon pen ni e'tane? Iye'menukasa' na'ne' kasa, "I'ri pan waku ton ni i'ta ton kamoro waku itekare ne'nin nan!"§ tawon.

16 E'tane tanporo Esuweru amu' esi'pu pen waku itekare awiri. Aisaya uya tasa' kasa, "Epuru, inu' uya ina nekamanu itekare apurisa?"* tawon.

17 Itepe'pu pe, apurito' uyepu tekamasen eta wini, miri awonsi'ki tekamasen useta Kurai maimu poro ina nekamanu pe te'sen. 18 E'tane ekama'po uya: To' uya pe' eta pu'ra iyese'pu? A'tai kanan ma: "To' maimu utisa' siya ri non awiri,

to' maimu utisa' non u'matu ya' ri,"†
tasa'. 19 Ekama'pokapu uya kanan: Esuweru uya pe' ito'ka'nuku pu'ra iyese'pu? Wapiya ri, Mosi' uya ta,

"Iyikintanuku uya 'nokon miri kamoro tɔpataron kon pen ni wini;

asakoropa uya 'nokon miri ito'ka'nu'nin nan pen ni tɔpataron kon wini,"‡

ta. 20 Miri a'tai nin si Aisaya uya ta miri enari'mura esii'ma,

"Kamoro uwarinpanin nan pen ni uya uyeporo'pu;

kamoro nai yau nai tawon nan pen ni ena' usenpoika'pu,"§

§ 10:15 Aisaya 52:7 * 10:16 Aisaya 53:1 † 10:18 Eren 19:4

‡ 10:19 Isu'taronomi 32:21 § 10:20 Aisaya 65:1

ta. ²¹ E'tane Esuweru pi' ta iya,
 “Pata tuko'manu'se ri uyemiyatu tinkai' uko'mamu
 ka'pon amu' main awiron kon pen miri
 awonsi'ki sa'man ni itewan ton ena',”*
 ta iya.

11

Esuweru Pu'ku Ru'san Apuriton Kon

¹ Iyekama'po uya ken si: Papa uya pe' tumunki
 amu' ewaruma'tisa'? Kane ku! Uri ri niri Esuweru
 pon, Epura'an pa ru'pu, Pensiman ko' winipaino.
² Papa uya tumunki ton ewaruma'tisa' para iyese,
 iwapiya ri tani'tu'san. I'tu auya para pe' nai
 iye'menukasa' itekare uya ta Iraisia pi' ipu'ku
 yau—Esuweru amu' pataka'pu iya Papa pi' iri pe
 to' e'sa' pi': ³ “Itepuru, amaimu ekamanin nan
 pu'kena' amu' wipitu'pu to' uya, miripan kon uya
 iyena' use'man nito' apon a'morupitu'pu; uri riken
 e'nonkasa', miripan kon esi uri ri niri inwika'pai,”*
 tawon? ⁴ I'ri ken si tukai' Papa uya eiku'pu nai?
 “Uiwano' pe 7,000 kaisaron kon nonkasa' uya man
 iye'sekunkasa' kon pen Peyaru pi',”† tukai'. ⁵ Miri
 kasa ri mari, seri a'tai tu'ke para to' tonpa'san esi
 waku nonkasa' wini anansa' kon. ⁶ Miri awonsi'ki
 waku nonkasa' wini iyese yau, tarawaso wini iyese
 pen; miri kasa iye'sa' yau, waku nonkasa' esi pen
 ni miri waku nonkasa' pe.‡

* **10:21** Aisaya 65:2 **11:1** Piri'pai 3:5 * **11:3** 1 Kin Amu' 19:10,
 14 † **11:4** 1 Kin Amu' 19:18 ‡ **11:6** Taron ni imenukasa' ton uya
 waku nonkasa' pe. E'tane tarawaso ton winon pe iyese yau, waku
 inonkasa' pe para ri nin si iyese miri; miri pe iyese yau, tarawaso esi
 miri tarawaso pe para ri, ta.

⁷ F'ri ken? Ipan pe tunwarinpa'p_u kon epasa' Esuwer_u am_u' uya p_ura iyese, e'tane t_uron kon to' tonpa ton an_usa' kon uya riken eporo'p_u. T_uron kon to' tonpa ton ewan usa'manta'p_u,
⁸ iye'menukasa' na'ne' kasa:

“Papa uya to' repa'p_u epe' ri e'nito' a'kwar_u ke,
en ton to' uya ene namai'
miri awonsi'ki pana ton to' uya eta namai',

seri w_ui p_u'k_u pona ri,”[§]

tukai'. ⁹ Miri awonsi'ki Tepi' uya ta:

“Tiwi to' tep_ur_uu nesii mare pe miri awonsi'ki to'
sa'manin pe,
to' e'pi'poto' ipona pe miri awonsi'ki to'
kota'manin pe.

¹⁰ Tiwi to' enu newarumam_ui to' uya ene namai',
miri awonsi'ki to' a'poi n_use'mei tiwiro' pe ri,”*
ta.

Are'na'tisa' Ipanta Ton

¹¹ Ekama'pokap_u uya kanan: To' ri pe' e'pi'po'p_u t_uuta'mo'kai' te'm_u'sa'ka ton kon pe p_ura? Pen ni! E'tane ru'ku, ap_une p_ura main p_uremek_u to' uya pi', epika'tin nito' uye'sa' Esuwer_u am_u' pen piya', Esuwer_u am_u' ikintan_u'nin pe. ¹² E'tane main p_ureme'sa' to' uya uya eke pe pata p_uremato' ne'sa' yau, miri awonsi'ki to' eno'masa' uya Esuwer_u am_u' pen p_uremato' eke pe kup_u yau, miri entai kuru si eke pe ri p_ureman nito' nep_u tanporo wak_u pe to' konekasa' Papa uya, uya!

¹³ Imiri'nokon auro'ka uya, Esuwer_u am_u' pen. Esuwer_u am_u' pen ena' itekare ekamai' enno'sa'

§ **11:8** Isu'taronomi 29:4; Aisaya 29:10 * **11:10** Eren 69:22-23

pe esi wenai, eke pe kuru utarawasooi kupu uya, ¹⁴ te'ku'se utonpa ton ikintanu'nin pe, to' tonpa ton ni epika'tito' pe. ¹⁵ To' uya ewaruma'tito' esi yau non konekanin pe, i'ri pe to' uya ananto' uya ikupu? Iyeri'sa' kon na'po kasa iyesi nurine to' e'to' ya'. ¹⁶ Ipu'ku pe wapiyaro' iteperu ki'masa' tusa' enasa' yau waku pe, miri a'tai nin si tanporon itonpa esi miri waku pe; imi' ton esi waku pe, miri kasa kanan ipanta ton esi miri.

¹⁷ Ipanta tonpa ton anpi'pu pe iyesi yau, imiri si, mi airon are' enpu pe iwe'tane, ike ipata'pu yai ri are'na'tisa', miripan nin si useweku ite'ku are' mi' winon pi', ¹⁸ miri ton ipanta ton pi' katapurii. Ikupu auya yau, se pi' isenuminka': Imi' esa' pe iwesi pen, e'tane imi' esi iyesa' pe. ¹⁹ Miri a'tai si, ta auya, "Ipanta ton anpi'pu uri ke itare'na'tito' pe." ²⁰ Iye'to' pe ri iyesi, e'tane anpi'pu miri apune para apuri para iyesi pi', miripan imiri nin si esi miri apurito' auya wini iye'mu'sa'kasa'. Mi pe ke'kupui, e'tane enari'nanki. ²¹ Apune para Papa uya i'naino ipanta ton enkurunpasa' para iyesi yau, imiri ri niri enkurunpa iya para iyesi miri.

²² Miri pe iyesi pi', mannu' pe Papa e'to' miri awonsi'ki isi yai konekan nito' iya pi' isenuminka': isi yai kamoro ita'mo'kasa' ton konekato' iya, e'tane mannu' pe ipi' iyesi, mannu' pe iye'to' yau iwesi yau kanan. Miri para iwesi yau, imiri ri niri a'ti miri. ²³ Miri awonsi'ki tapurii' para e'nito' yau to' esi para iyesi yau, to' ri are'na'ti ipona, apune para Papa ri esi to' are'na'tika'nin pe ri kanan. ²⁴ Miri ri ta tane, auta'tisa' pe iyesi yau are' e' apai mi airon ni i'naino airon, miri awonsi'ki i'naino waraino pen ni utare'na'tisa' ipatamasa' are' e' ya',

miri entai kuru ri nin seri ton, i'naino ton ipanta ton, esi miri itare'na'ti taye' are' e' kuru ri nin pona!

Tanporo Esuweru Amu' Epika'tito' Oton

²⁵ Tonan tawon i'tunin nan pe para iwesi kon i'se para e'ai', utonpa ton, autaperuka kon namai': Esuweru uya sa'man pe enan i'tusa' miri ipu'ku pe ri tanporo Esuweru amu' pen ewomu pu'ku pona.

²⁶ Miri kasa nin si tanporo Esuweru amu' epika'ti miri, iye'menukasa' na'ne' kasa:

“Mo'kanin uye'to' oton Sayan wini;

Papa para e'nito' ra'ti iya Seko' piyapai.

²⁷ Seri nin si miri† to' pokon pe ekonekato' iwini to' makooi mo'kasa' uya a'tai,”‡

tukai'.

²⁸ Waku itekare esi na'ne' awiri, i'seyaton pe to' esi miri imiri'nokon pikiri; e'tane utanun nito' esi na'ne' awiri, to' usi'nunka tutamokori kon pikiri, ²⁹ apune para Papa naturunu ton miri awonsi'ki ki'man nito' iya esi inna'ponu pe para.

³⁰ Pena Papa Maimu awiri para me'ta'tuine' kasa, main awiri para to' esi moron nu'pu pe ipi'nokon usentu'man nito' eposa' auya'nokon, ³¹ miri kasa ri mari, Papa usentu'masa' ipi'nokon moron nu'pu pe, to' nin si enasa' main awiri para tui'pikon usentu'man nito' epoto' pe tuuya'nokon. ³² Apune para Papa uya tanporo ka'pon amu' a'sisa' main awiri para e'nito' ya', tanporo to' pi' tuusentu'mato' pe.

Papa Apuripi'to'

† **11:27** Seri nin si miri; miri pe para, Seri e'to' oton ‡ **11:27**
Aisaya 59:20-21; 27:9; Iseremaya 31:33-34

- 33 Eke si i'nawon ni Papa e'to' eke pe ipu'ketu miri awonsi'ki i'tunin pe iye'to'!§
 Iwarinpa pokena' pen ni eseru aimenkato' iya,
 miri awonsi'ki e'ma'puka pokena' pen ni ite'ma'pu!
- 34 “Inu' uya Itepuru usenuminkato' i'tu'pu?
 Miri pe puṛa, inu' ri esi'pu ipana'tinin pe?”*
- 35 “Inu' uya ri Papa repa'pu,
 Papa uya te'mato' pe?”†
- 36 Apune puṛa iwinipai miri awonsi'ki iporo miri awonsi'ki itiwano' pe tanporon ni esi.
 Itiwano' pe eke pe iku'to' nesii, tiwiri ri! Amen.

12

Nurinan Use'man Nito' Ike

¹ Miri pe iyesi pi', iyekama'po uya 'nokon kuru, utonpa ton, isentu'ke' pe Papa esi pi', te'tusen pe iwesi kon pa nurinan use'man nito' ton ike ye' pe, waku, Papa pori'manin ye' pe—iya'kwaru* yau apuripi'to' auya'nokon. ² Seri oru eseru awiri inke ke'tuu, e'tane isensimati' kuru iusenuminkato' kon eseru kupu wini emenna' pe, Papa eseru waku pe te'sen i'tunin pe nin si iwesi kon pa miri awonsi'ki waku pe iyesi ta kon pa—pori'manin pe te'sen miri awonsi'ki ima'takuu puṛa te'sen.

³ Apune puṛa waku nonkasa' uyena' wini ta uya tanporo imiri'nokon pi': Eke pe kuru ri

§ 11:33 Papa e'to' eke pe ipu'ketu miri awonsi'ki i'tunin pe iye'to'; miri pe puṛa, Papa e'to' eke pe, miri awonsi'ki ipu'ketu pe, miri awonsi'ki i'tunin pe iye'to'! * 11:34 Aisaya 40:13 † 11:35 Isopu 41:11 11:36 1 Koren 8:6 * 12:1 iya'kwaru, miri pe puṛa ikupu poken

ipi'nokon ke'ku'tau iwe'to' kon entai ri, e'tane ru'ku, eseru aimenkato' yai isenti' nurinan yai, apurito' auya'nokon ke ti'tui' Papa uya irepasa' kon na'ne' ike. ⁴ Tikin ni upun kon esa' esi na'ne' kasa tu'ke ri ipu'ku ton e'tane, miripan seri ton ipu'ku ton esi pen tikin ni iturawasooi, ⁵ miri kasa Kurai yau uri'nokon, tu'kan kon ni ena tikin ni ipun pe, miripan esi isipu'ku pe'ne. ⁶ Isi'tai repapi'nito' esi, waku nonkasa' uyena'nokon awiri. Ka'pon repato' ike pe pu'kena' pe usauro'nito' esi yau, tiwi napurii apurito' tauya yau iyesi kaisari ri. ⁷ Apiyo' pe iyesi yau, tiwi apiyo' pe nesii; enupanin pe iyesi yau, tiwi enupan pi' nesii; ⁸ pori'mapi'nin pe iyesi yau, tiwi pori'man pi' nesii; entu'manin nan repanin pe iyesi yau, tiwi amare'mura ne'repai; epuru pe iyesi yau, tiwi esa' wanni pe nesii ari'kena' pe; tausentu'masen pe iyesi yau, tiwi pori' pe esii'ma nukupai.

Usi'nankan Nito'

⁹ Usi'nankan nito' nesii i'nairon pe kuru. Iri eseru ewaruma'titi'; waku pi' ata'siti'. ¹⁰ Tausi'nankasen pe e'ti' isitonpa pe. Itonpa kon tnamai' iyentaino kon pe e'ti'. ¹¹ Emiya'ne' pe ke'tau, e'tane inku'paino ye' pe kuru aya'kwaru kon ke, Itepuru apiyo' ton pe e'ti'. ¹² Pori' pe e'ku'nito' yau, isi yau e'ni moronkanin pe e'ti', ipureman yau te'nonkasen pe pura. ¹³ Papa munki amu' tekota'masan tarepai' e'ti'. Ka'karan ereutan'sa' a're'tito' eseru taku'se e'ti'.

¹⁴ Tawipuremai' waku kupu auya'nokon we-nai ikota'manin kon pona e'ti', te'pa'nu'se pura

e'ti'. ¹⁵ Tepori'mai' tepori'masan pokon pe e'ti'. Tɔukaranse tɔukaransan pokon pe e'ti'. ¹⁶ Wakɔ pe iseseru yau tɔko'mansan pe e'ti'. Mi pe te'ku'san pe pɔra e'ti', e'tane se pe te'san pokon pe te'san pe e'ti'. † Tɔutaperɔkasan pe pɔra e'ti'.

¹⁷ Iri ku'nin nɔ'pɔ ipi'nokon kɔse'matɔu iri ke. Ti'tui' wakɔ iku'ti' ka'pon amɔ uya iyentane'nokon. ¹⁸ Ikupɔ poken iyesi yau, iiwano' kon pe iwe'to' kon awiri, iko'manti' isi pe pɔra tanporon kon pokon pe. ¹⁹ Kise'matɔu, utonpa ton, e'tane Papa uya kota'man nito' pata tɔku'se e'ti', apɔne pɔra iye'menukasa' esi: “Uri iwano' miri e'man; uri uya ri e'ma,” ta Itepuu uya. ‡

²⁰ Miri pe pɔra:

“Iwan pe iyeyaton esi yau, a're'tiki;

tuna'kiri' ke iyesi yau, iwo'paki.

Seri kupɔ auya uya enkena' kamarɔka' amɔranɔkɔ

miri i'pai pona,” §

tasa' iya. ²¹ Iri kuru kɔsenanin iyentai'nokon, e'tane iri entai enati' wakɔ ke.

13

Eke Ton Ena' E'tɔn Nito'

¹ Tanporon kon e'tato' pe iyesi eke ton esa' wannu pe te'san ena', apɔne pɔra moro inɔ' ri eke pɔra iyesi Papa nɔ'mɔ'sa'ka'pɔ pen. Eke pe na'ne' nan esi Papa nɔ'mɔ'sa'ka'san pe. ² Miri pe iyesi pi', inɔ' ri eke pe te'sen ewa'nomanin uya Papa nɔkuu'pɔ ewa'noma miri, miri awonsi'ki kamoro

12:14 Ma'siu 5:44; Ɔru' 6:28 † **12:16** se pe te'san pokon pe te'san pe; miri pe pɔra, se pe rɔ'kwɔ ri te'san tarawasooi ye' inku'paino pe e'ti' **12:16** Ipu'ketɔ 3:7 ‡ **12:19** Isu'taronomi 32:35 § **12:20** Ipu'ketɔ 25:21-22

miri ku'nin nan uya eseru aimenkato' nepu miri tupaona'nokon ni. ³ Apune para nari' pe te'san pen ton ni kamoro esanon wanni ipokena' ku'nin nan pona, e'tane kamoro nin ipokena' pen ku'nin nan. Eke pi' pe' enari'mara e'pai me'atuu? Ipokena' ken si iku'ti' ayapuripi'to' kon pe iya nin si. ⁴ Apune para Papa poitoru pe iyesi waku pe iku'nin kon pe. E'tane ipokena' pen ku'sa' auya'nokon yau, ipi' enari'nanti', notan pe supara esa' pe te'sen pen kari ri. Papa poitoru kari ri, Papa uya kota'man nito' ne'nin kamoro iri ku'nin nan kota'mai'. ⁵ Miri pe iyesi pi', e'tan nito' pe kuru iyesi eke ton ena', to' uya kota'man pi' riken pen, e'tane ewan wanni uya i'tu pi' ri. ⁶ Miri wenai ri niri tamaranu'sen parata e'ma auya'nokon miri, apune para Papa poitoru pe eke ton esi pi', inke ri esa' wanni pe te'san pe. ⁷ Tanporo inwoma'san kon e'mati': Tamaranu'sen omasa' auya'nokon yau, e'ma'ti'; intaranu kon yau iye'womasa' kon yau, e'mati'; eke pe iku'to' yau iye'womasa' kon yau, eke pe iku'ka'ti' ri; inamato' yau iye'womasa' kon yau, inamaka'ti' ri.

Isi'nunkati', Apune Para A'ko Pe Iweyu Esi Pi'

⁸ I'ri ri te'masen kusenkurunpatuu te'mai' para, iusi'nunkato' kon niken enkurunpati' miyari ri usi'nunkan pi', apune para kari tutonpa i'nunkanin uya main a'ku'tisa' pe iyesi. ⁹ Apiyontin nito' ike ton, "Iyemari'masa' pe esii'ma kekumai," "Inu' ri ku'winii," "Ama' pe kesii," "Ipan pe itonpa iwano' i'se kesii,"* miri awonsi'ki i'ri ton ni apiyontin nito' esi na'ne' amurasa' miri se tikin nan iporo e'nito'

13:7 Ma'siu 22:21; Ma' 12:17; Uru' 20:25 * **13:9** E'sotas 20:13-15; Isu'taronomi 5:17-19, 21

yau: “Ittonpa i'nʉnkaki, misi'nʉnkayai'ne' kasa ri,”†
tawon. ¹⁰ Usi'nʉnkan nito' esi isi pe tutonpa ku'nin
pen ni. Miri pe iyese pi', usi'nʉnkan nito' esi main
awiri e'ni ekamanin pe.

¹¹ Miri awonsi'ki seri si iku'ti', seri pe e'nito'
to'ka'nʉkʉ pe. Iweyu e'seposa' man aupakato'
kon iye'nʉnto' kon apai, apʉne pʉra a'ko pe si
epika'tin nito' esi pi' wapiya apuri a'tai iyese'pʉ
entai. ¹² Ewarupi utiiwaka'ni pi' man; pata
ema'kapʉ pe ri iyese. Miri pi' ewarupi yau tuku'sen
amaka'pai'nokon miri awonsi'ki a'kwa amataai
ya' enai'ma. ¹³ Waku pe te'san pe e'nipai'nokon,
wʉi naino kon pe, ipi' ri te'kamai' e'taripan pi'
pʉra miri awonsi'ki te'taripasan pe pʉra, ekuman
pʉra miri awonsi'ki ipan pe iri kupʉ pi' iko'manpai
e'ni pi' pʉra, iseseru yau pʉra e'nito' pʉra miri
awonsi'ki ikintan pʉra. ¹⁴ E'tane ru'ku, Itepuru
Sises Kʉrai ke epontinpai'nokon, miri awonsi'ki
a'naino kon makoi‡ e'to' i'se pi' tʉusenunkai'
pʉra imaimu awiri iwe'to' kon pi'.

14

I'si'mʉra Miri Awonsi'ki Pana'pan

¹ I'si'mʉra na'ne' apurito' iya yau, ananti', ite-
seru taimenkai' pʉra tʉron ni pe iteseru esi pi'
ipokon pe te'sei'pi'se pʉra. ² Tikin nan ka'pon
uya apurito' uya ikupʉ tanporon pi' ri tenta'nasen
pe, e'tane tʉron ni, i'si'mʉra te'sen apurito' iya
enta'na ipatamasa' kiyari pi' riken. ³ Ka'pon tan-
poron pi' ri tenta'nasen, kʉri ipatamasa' kiyari pi'

† 13:9 Ripaiti'kas 19:18 ‡ 13:14 a'naino kon makoi, miri pe pʉra
ipun kon

tenta'nasen pi' ku'sewaruma'tinin, miri awonsi'ki ka'pon tanporon pi' tenta'nasen pen kari tanporon pi' tenta'nasen pe te'sen eno'manin, apune para Papa uya anansa' pe iyesi pi'. ⁴ Inu' pe ken iwesi, ka'pon poitoru ri eseru aimenka pa? Itesa' pona iye'mu'sa'kasa' pe iyesi miri pe para ita'mo'kasa' pe ri. Miri awonsi'ki iye'mu'sa'ka ri si, apune para Itepuru uya iye'mu'sa'kato' pe ikupu pi'.

⁵ Turon ni ka'pon pona eke tunamasen pe tikin nan wai esi turon ni ton kasa para; turon ni ka'pon pona tanporon ni wai esi isi'kaisa ri. Tukaisari'nokon tausenuminkato' kon awiri to' nesii i'se te'to' kon pe kuru. ⁶ Kari eke pe kuru tikin nan wai esi nikayai'ne' uya ikupu miri Itepuru iwano' pe. Kari o' anyai'ne' uya ani miri Itepuru iwano' pe, apune para Papa pi' tenki ta iya ke; miri awonsi'ki kari ani iya para na'ne' uya ikupu miri Itepuru iwano' pe, miripan uya tenki ta Papa pi'. ⁷ Apune para uri'nokon uko'mamu uiwano' kon pe riken pen, miri awonsi'ki eri'ni uiwano' kon pe riken pen. ⁸ Uko'man ni pe iyesi yau, Itepuru iwano' pe uko'man ni; miri awonsi'ki eri'ni pe iyesi yau, eri'ni Itepuru iwano' pe. Miri pi' si, uko'man ni pe iyesi yau miri pe para eri'ni pe iyesi yau, Itepuru iwano' pe ri e'ni.

⁹ Seri wenai kuru si, Karai eriku'pu miripan e'mu'sa'ka'pu nurine te'to' ya', iyeri'sa' kon miri awonsi'ki nurine te'san epuru pe te'to' pe. ¹⁰ Imiri si, i'rito' pe itonpa eseru aimenka auya? Miri pe para, i'rito' pe itonpa ewaruma'ti auya? Tanporo uri'nokon e'mu'sa'kasa' e'to' oton Papa uya eseru

aimenkato' apon piyau. ¹¹ Iye'menukasa':

“ ‘Uko'manyai'ne' kasa,' ta Itepuru uya,

‘Tanporon kon e'sekunkato' oton urau;

tanporon ani uya ekamato' oton Papa pi', ”*
tukai'. ¹² Miri pi' nin si, ukaisari'nokon usekaman
nito' oton kon Papa pi'.

¹³ Miri pe iyese pi', utonpa kon amu' eseru
aimenkato' ereutanu'pai'nokon. E'tane ru'ku,
iusenuminkato' kon ikonekati' itonpa kon
e'pi'poto' ipona miri pe para iwa'ku'nin taru
auya'nokon namai' ite'ma ta'. ¹⁴ Uri, Itepuru Sises
yau te'sen ye' pe, upona kuru iri pe te'sen kiyari†
para ri iyese. E'tane inu' uya ri iri pe ikupu yau, iri
pe ri iyese miri ipona. ¹⁵ Itonpa e'kauma pe iyese
yau anani'pu pi', usi'nankan nito' esi pen ni miri
inkupunu yau. Anani'pu itonpa ma'tanu'nin Kurai
uma'ta'pu iwenaino pe ru'pu. ¹⁶ Waku pe inkupunu
kuse'nin iri pe usauro'nito' ipi' pe. ¹⁷ Apune para
Papa e'to' esa' wannu pe esi pen enta'nan miri
awonsi'ki ensi pe pen, e'tane Papa uya anan ni
ipokena' pe, tusewankamai' para miri awonsi'ki
pori' pe Waku A'kwaru yau, ¹⁸ apune para Kurai
tarawasooi pe te'sen seri kasa esi Papa pori'manin
pe miri awonsi'ki ka'pon amu' uya waku tato' ipi'
pe.

¹⁹ Miri pe iyese pi', tusewankamai' para e'nito'
ya' miri awonsi'ki isi'kaisa ri usemo'kan nito' pe
apurito' yau epika'tin nito' ya' anin ku'pai'nokon.
²⁰ Papa tarawasooi ku'ma'tanu'tau kiyari pikiri ri.
Tanporon kiyari esi waku pe Papa enu yau, e'tane

14:10 2 Koren 5:10 * **14:11** Aisaya 45:23 † **14:14** iri pe te'sen
kiyari; miri pe para, iri pe te'sen

ipoken p̄ra iyese ka'pon enta'na a'tai t̄ron ni e'pi'po emapu'tinin pe. ²¹ Waku pe pari iyese o' tanse p̄ra e'ni miri pe p̄ra waain tensii' p̄ra miri pe p̄ra i'ri ri t̄ku'se p̄ra itonpa uta'mo'ka emapu'tinin pe.

²² Miri wenai, mapuriyat̄i'ne' seri ton pi' enkurunpati' imiri'nokon miri awonsi'ki Papa ya' riken. Pori' pe te'sen k̄ri ri ka'pon tiwano' pe t̄useno'masen pen waku tato' t̄uya ipi' wini.

²³ E'tane k̄ri ka'pon ikasimanin useno'masa' miri iyenta'nasa' yau, ap̄ne p̄ra iyenta'nato' esi apurito' iya wini p̄ra; miri awonsi'ki tanporon apurito' wini p̄ra n̄ye'ai'ne' esi makoi pe.

15

¹ Uri'nokon pana' pe te'san e'to' pe iyese i'si'manon pokon pe to' uya ikupu p̄ra iye'to' yau to' pika'ti pi', iwano' wanni pe ri upori'manin kon t̄ku'se p̄ra. ² E'ni na'ne' kaisa ri utonpa kon t̄pori'mai' e'nito' pe iyese, waku pe to' ku'nin pe, to' pika'tinin pe t̄usemo'kasan pe to' uya apurito' yau. ³ Ap̄ne p̄ra K̄rai ri niri uya t̄pori'manin ku'sa' p̄ra iyese, e'tane iye'menukasa' na'ne' kasa: “Asapemato' asapemanin nan uya uta'mo'kasa' man upona,”* tasa'. ⁴ Ap̄ne p̄ra tanporon ni iye'menupi'sa' na'ne' e'menupit̄u'p̄u uyenupanin kon pe, imoronka wini miri awonsi'ki iye'menukasa' itekare uya t̄pori'mai', e'ku'nito' epoto' pe.

⁵ Tiwi Papa imoronkato' pe ku'nin miri awonsi'ki pori'mapi'nin a'samat̄u yau iwesi kon a'kwar̄u ke irepat̄u K̄rai Sises pikiri iwesi kon

* 15:3 Eren 69:9

koro'tau, ⁶ tikin ni nin si itewan miri awonsi'ki inta esii'ma uri'nokon Epuru Sises Kurai e'to' itese' pi' Papa miri awonsi'ki Ikuipuna apuripitu kon pa.

⁷ Itonpa kon si tanunse e'ti', Kurai uya ayanansa' kon na'ne' kasa, Papa apuripi'to' ne'nin pe. ⁸ Ekama uya ipi'nokon Kurai enasa' Esuweru amu'† poitoru pe Papa e'to' i'nairon pe ekamanin pe, isauro'sa' ru'pu iku'to' pe tuuya tukai' tamokori ton amu' pi' ⁹ Esuweru amu' pen uya Papa apuripi'to' pe isentu'ke' pe iyese pi', iye'menukasa' na'ne' kasa:

“Seri wenai ayapuripitu uya miri Esuweru amu' pen koro'tau;

eren erenka uya miri iyese' pi',”‡

tasa' iya. ¹⁰ Taka'sa' iya kanan,

“Epori'mati', Esuweru amu' pen, imunki amu' pokon pe,”§

tasa' iya. ¹¹ Miri awonsi'ki kanan,

“Itepuru apuripi'ti', tanporon kon Esuweru amu' pen,

miri awonsi'ki apuripi'to' erenkati', tanporon kon ka'pon amu',”*

tasa' iya. ¹² Miri awonsi'ki kanan, Aisaya uya ta,

“Ise'si Atu ru'pu e'mu'sa'ka miri,

ku'ri te'mu'sa'ka ton tupaaron kon esa' pe te'to' pe;

Esuweru amu' pen e'ku'to' e'to' oton iyau,”†

ta iya.

¹³ Tiwi Papa e'ku'nito' ipi' ikupui'nokon eke pe kuru pori' pe miri awonsi'ki tausewankamasen

† 15:8 Kiri' maimu uya itun pi'pi' iputurakasa' ton ta, ‡ 15:9 2

Sanweru 22:50; Eren 18:49 § 15:10 Isu'taronomi 32:43 * 15:11

Eren 117:1 † 15:12 Aisaya 11:10

pe p̄ra tapuri auya'nokon koro'tau, ayanuku kon pa iye'ku'to' kon ike ke Wak̄ A'kwar̄ meruntir̄ wini.

Paar̄, Esuwer̄ Am̄ Pen Poitor̄

¹⁴ Sapuriyai' kuru ri, utoṅpa ton, imiri'nokon esi wak̄ pe kuru ri, i'tuto' auya'nokon yau iyenuka'sa' pe iwesi kon miri awonsi'ki itonpa kon enupanin nan pe kuru ri. ¹⁵ Imenukasa' uya 'nokon man enari'm̄ra t̄ron ni ton pi'ne, iyemiya'pontikap̄ kon pe ri kanan, Papa uya wak̄ nonkasa' pi' ri urepa pe, ¹⁶ K̄rai Sises poitor̄ pe e'to' pe Esuwer̄ am̄ pen iwano' pe use'man t̄rawasomanin eseru yau wak̄ Papa ekareei ekama pi', Esuwer̄ am̄ pen enato' pe Papa nan̄m̄n̄ ton wak̄ t̄t̄san ton pe, Wak̄ A'kwar̄ wini iyekonekasa' kon pe.

¹⁷ Miri pe iyesi pi', mi pe e'kup̄ K̄rai Sises yau Papa poitor̄ pe esi pi'. ¹⁸ I'ri pi' ri usaurok̄ pen K̄rai n̄kup̄'p̄ uporo pi' riken Esuwer̄ am̄ pen ari pi' Papa Maimu awiron kon pe usauro'sa' r̄'p̄ miri awonsi'ki unkup̄'p̄ wini— ¹⁹ ento' ipi' miri awonsi'ki eke Papa t̄rawasooi meruntir̄ wini, Iya'kwar̄ meruntir̄ poro. Miri pi' si Surusiran ponsi'ki siyari Iriri'kun pona ri, wak̄ itekare K̄rai iwano' ekama pi' e'sa' seri tanporo kuru ri. ²⁰ Wak̄ itekare inekamapai kuru e'pi'pit̄ K̄rai i'tu p̄ra na'ne' airi, in̄ ri n̄tukaa'p̄ po ami uya namai'. ²¹ E'tane ru'ku, iye'menukasa' na'ne' kasa: “Kamoro ipi' auro'kasa' kon pen uya ento' oton, miri awonsi'ki etanin n̄'san pen uya ito'ka'n̄'to' oton,”‡

‡ 15:21 Aisaya 52:15

tasa' iya. ²² Miri wenai inke ri ipiya'nokon uti para iyesi usemapu'tipi'sa' miri.

Paaru Ekonekato' Ron Pona Uti Pi'

²³ E'tane si seri ton nono yau e'tarawasomato' para iyesi pi', miri awonsi'ki inke kuru ri wai piya tenno'pi'se iyenpai'nokon e'sa' pi', ²⁴ ikupu pi' nin si ekoneka uti a'tai Su'pen pona. Uti koro'tau ipiya'nokon upika'ti kon pa utito' yau, miri yau uyewakiri pe ri aka'ne' pe ri ipokon pe esi tupo. ²⁵ E'tane para ri, uti si seri Surusiran pona waku ton miri yawon kon apiyo' pe. ²⁶ Apune para Ma'sitoniya miri awonsi'ki A'kaya pon kon esi'pu pori' pe entu'manin nan waku ton koro'tawon kon Surusiran pon kon pika'ti tauya'nokon pi'. ²⁷ Pori' pe ri to' esi'pu ikupu tauya'nokon pi', to' uya iku'to' pe ri iyesi to' iwano' pe. Apune para Esuweru amu' pen uya Esuweru amu' neporonu iya'kwaru pe te'sen waku ri eposa' pe iyesi yau, to' uya kuru ri iku'to' pe iyesi Esuweru amu' pokon pe ri non pon waku ri tiwano' kon ekanto' pe iyesi. ²⁸ Seri si tarawaso enuka'nu'sa' uya tupo miri awonsi'ki to' uya si taneporonu kon eposa' ene tupo, uti si miri Su'pen pona uti pe iyenei'ma'nokon. ²⁹ Si'tuyai', uye'sa' a'tai ipiya'nokon, uye'pu miri eke pe kuru Kurai uya ipuremasa' kon esa' pe.

³⁰ Iyekama'po uya 'nokon kuru, utonpa ton, uri'nokon epuru Sises Kurai miri awonsi'ki Iya'kwaru usi'nankato' wini, e'suranmato' yau tikin ni upokon pe iyena kon i'se esi, upona Papa pi' iwipurema kon yau. ³¹ Ipuremati' apurinin nan pen Isutiya pon kon enapai emo'kato' pe

miri awonsi'ki Surusiran po e'turawasomato' e'to' pe wak_u ton miri yawon kon nanam_u pe. ³² Miri a'tai si Papa eseru pe iyese pi' uye'to' pe ipiya'nokon pori' pe ipokon pe e'se'na. ³³ Papa, usewankaman nito' p_un ni nesii tanporo ipiyau'nokon. Amen.

16

Tumiri Pe Ri Nin Si Miyari Tato' Iya

¹ Ipi'nokon ina parusi Pepi ekama uya, so'si Senk_ure yawon poitor_u pe te'sen.* ² Iyekama'po uya 'nokon Itepuru awiri an_um_u kon pa wak_u ton an_unto' eseru yau miri awonsi'ki i'ri ri i'se iye'to' iwini'pains kon ke ipika'titi', ap_une p_ura eke pe ri tu'kan kon ni ka'pon am_u' pika'tinin k_uri ri, uri ri to' tonpa pe.

³ Miyari ka'ti' P_ure'sira† miri awonsi'ki A'kira pi', e'turawasoma K_urai Sises yau tonpa ton pi'. ⁴ T_uuma'tato' kon annau ri upika'ti'p_u to' uya. Uri riken pen e'tane tanporon ni so'si ton Esuwer_u am_u' pen iwano' ton esi pori' pe to' pi'.

⁵ Miyari ka'ti' ri mari so'si to' iw_u' tau tam_urasan pi'.

Miyari ka'ti' utonpa r_u'kw_i Epene'tos pi', wapiya kuru iyera'tisa' r_u'p_u K_urai winik_ui' Eisa nono po.

⁶ Miyari ka'ti' Meri pi', sa'man pe kuru iwano' kon pe iye'turawasomasa' r_u'p_u.

* **16:1** poitor_u; miri pe p_ura, uri'san so'si epuru pika'tinin † **16:3** Kiri' maimu uya P_ures_u'ka ta. **16:3** Inkup_u'p_u 18:2

- 7 Miyari ka'ti' Antaroni'kas miri awonsi'ki Isuniyas,‡ utonpa ton, upokon pe pariki'si tau iye'sa' kon. Eke ton pe kuru itekare ekamai' enno'sa' kon koro'tau te'san kamoro, miri awonsi'ki urawiri Kurai yau to' esi'pa.
- 8 Miyari ka'ti' Anpariya'tas pi', Itepuru yau uni'nankanu.
- 9 Miyari ka'ti' Orapanos pi', Kurai yau e'turawasoman tonpa, miri awonsi'ki utonpa ru'kwi Su'ta'kes.
- 10 Miyari ka'ti' A'peres pi', waku ye' pe Kurai yau i'tusa'.
Miyari ka'ti' Arestoporos tonpa ton pi'.
- 11 Miyari ka'ti' utonpa, Esuweru pe te'sen Eratiyan pi'.
- Miyari ka'ti' Narusisas amutu pe te'san pi', Itepuru yawon kon.
- 12 Miyari ka'ti' Turai'pina miri awonsi'ki Turai'posa pi', kamoro uri'sami'si amu' sa'man pe ri te'turawasomasan Itepuru apiyo' pe.
- Miyari ka'ti' utonpa ru'kwi Piruses pi', kuri ri kanan uri'san sa'man pe kuru ri iye'turawasomasa' Itepuru apiyo' pe.
- 13 Miyari ka'ti' Ru'pos pi', anansa' Itepuru iwano' pe, miri awonsi'ki isan, usan pe ri kanan iye'sa' ru'pa.
- 14 Miyari ka'ti' Asenkuri'tas, Purekon, Irames, Pa'turopas, Iramas miri awonsi'ki tonpa ton amu', to' piyau na'ne' nan pi'.
- 15 Miyari ka'ti' Pirorokas, Isuriya, Nereyas miri

‡ 16:7 Isuniyas; miri pe para Isuniya; miri pe para Isuriya —uri'san pe iyesi'pa ta e'kwa pe. 16:13 Ma' 15:21

awonsi'ki iparusi, miri awonsi'ki Orenpas miri awonsi'ki tanporo wakꞄ ton to' piyau na'ne' nan.

16 Miyari ka'ti' isipokon pe wakꞄ eseru yau auta'su'ka kon pe.

Tanporon Kurai so'sii ton miyari nikayan.

17 Iyekama'po uya 'nokon kuru, utonpa ton, kamo e'ta'nꞄ'ni emapu'tinin nan enei'ma iwesi kon pa miri awonsi'ki iye'mata'nokon awa'kꞄ'nin kon tꞄnin nan. To' nꞄkupꞄnꞄ esi iusenupa'pꞄ kon ipi' kasa pꞄra ri. To' piyau ke'tꞄu. 18 ApꞄne pꞄra pꞄsamoro rupi esi uyepuru kon Kurai apiyo' pe pꞄra, e'tane tiwano' kon ni. WakꞄ pe kuru ri tꞄusaurokꞄ kon ke, miri awonsi'ki ennakan nito' ike ke entu'ma' ri te'san ka'pon amꞄ' enku'ti to' uya. 19 Tanporon kon uya ri main awiri iwe'to' kon etasa' man, miri wenai ipan pe ri pori' pe e'ai' ipi'nokon; e'tane wakꞄ pe te'sen ti'tui' iwesi kon i'se e'ai', miri awonsi'ki iri ku'nin nan ye' pe pꞄra.

20 Papa usewankaman nito' pꞄn ni uya Se'tanꞄ amo'korokꞄ miri a'ta kon o'no.

Uyepuru kon Sises uya wakꞄ nonkasa' nesii ipiyau'nokon.*

21 Temu'ti, e'tꞄrawasoma tonpa man miyari ta pi' ipi'nokon, Rusiyas ri, Ise'sꞄn miri awonsi'ki So'sipa'tirꞄ, utonpa ton.

22 Uri, TirꞄ'tiyas, kareta menukanin nꞄ'pꞄ, miyari nikayan ipi'nokon Itepuru yau.

§ 16:20 Se'tan—Makoi ese' isakon, Papa eseru ewaruma'tinin ta e'kwa pe. * 16:20 TꞄron ni ton imenukasa' ton uya seri airon nonkasa'. 16:21 InkupꞄ'pꞄ 16:1

²³ Kayas, tewakiri kon pe uri miri awonsi'ki tanporo ri so'si na'ne' serì yau itiwu' tau te'san miyari nikayan ipi'nokon.

Erastas, eke pata parataai esa' pe te'sen, miri awonsi'ki utonpa kon Kuwaru'tas miyari nikayan ipi'nokon.†

²⁵ Apuripi'to' tupaï'nokon Papa ena'! Pana' pe iye'mu'sa'ka kon apuri auya'nokon yau kupu iya, waku itekare sekamayai'ne' kasa ri, itekare Sises Kurai pi' miri awonsi'ki ama'aino i'nairon onansa' ru'pu pena ri usenpoikasa' na'ne' kasa ri. ²⁶ E'tane nin si isenpoikasa' pu'kena' amu' namenuka'pu awiri Papa tiwi ri tauko'mansen uya apiyontin awiri, tanporo tupaaron kon uya tapurito' pe miri awonsi'ki tumaimu awiri to' e'to' pe. ²⁷ Papa ri ken ta'kwaru kenan iwano' pe eke pe iku'to' nesii tiwiri ri Sises Kurai poro! Amen.

† **16:23** Taron ni imenukasa' ton uya v. 24 ke iponantisa' se kasa: 24 Tiwi uyepuru kon Sises Kurai uya waku nonkasa' na'ne' nesii tanporo ipiyau'nokon, Amen ta.

**Wakɛ Itekare: Emenna' Pe Ekonekan Nito'
New Testament in Akawaio (GY:ake:Akawaio)**

copyright © 2010 Wycliffe Bible Translators, Inc.

Language: Akawaio

Translation by: Wycliffe Bible Translators, Inc.

Akawaio

ake

Guyana

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akawaio

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

0a50da4e-768d-5472-9dd1-d9747ff5918f